

# TELE MORTÂLITE

Créyâcion d'ine comédeye è treus aktes d'a Florent Goffin

## Personèdjies

06 omes – 02 feumes

Roland Delmousse :	Li prôducteûr
Hinri Delmousse :	Fré d'a Roland et croque-mwert
Pénélope :	li sècrètère
Tîbât Luxembourg	Li réyâlizateur
Bertrand :	Prézintateur
Jwana :	Li grimeuse
Tchètchè :	L'ajant di sécurité
Luc Tillemans :	Moncheû météo

## Décor

*Li buro d'on prôducteûr d'ine station tv*

A dreute :	Pwète d'intreye
A mittant :	Ine grande finièsse
Al inche :	Pwète dè buro di Pénélope

Di nos djous, nos n'vèyans pus des èmissions qui ont ni cou, ni tièsse....afin, pus c'est bièsse et pus c'est pleyant. Volà qui l'osté si termine et i fât trover d'ôtes ideyes po assèchi les djins divant leu TV.....les ideyes les pus neures et pus bièsses sont les bins vinowes.

## AKTE I

### Sinne I

Roland – Pénélope

*Nos estans divins li buro dè prôducteûr. Roland est étrin dè dicter ine note di chervice a si sècrètère*

Roland :	« .....nos priv'nans li personnel qui nos n'volans pus aveur di tèt istwères divins les meûrs di nosse respectâbe mohone. Totes djins volans djâser so cist kèsse là, sèrè rimerci so l'cop ». Po l'restant, vos savez çou qui fât mette, tapez'l à pus vite et après vos d'mandrez à patron si çoulà convins
Pénélope :	Si dji poû mi permette, sèreut-i nin préférâbe dè sicrire.....

- Roland : Dj'a di...et asteur, tapez'm li lette et alez'm cwèri li rèyâlisateûr, i m'sonle qui dwème cis-là. Dji rattind co ses ideyes d'émissions, c'est todi mi qui deû fé tot chal. Et adon, qui fêz'v là ?
- Pénélope : Dji r'li mes notes
- Roland : Vos d'vîz èsse dèdjà èvoye
- Pénélope : Bin moncheû (*sort pwète principåle*)
- Roland : Wice alez'v ?
- Pénélope : Dji'm va cwèri li rèyâlisateûr
- Roland : Dji n'sé nin si vos l'savez mins, i-n-a in' aparèye qu'on loume téléphone, prinez'l et houki'l al plèce dè corri po rin. I fât tot vos dire
- Pénélope : Awè moncheû, vos avez rêzon (*prind li téléphone d'a Roland*)
- Roland : Ni vos djinez nin, si dji so d'trop, dihez'l. Dji'n disrindje nin ?
- Pénélope : Néni, vos polez continuwer vos ovrèdjès
- Roland : Tint qui vos y estez, vos polez vos assîr divins mi fôteuye
- Pénélope : Merci, vos estez bin djinti....ni'v disrindjez nin por mi. I n'est nin divins s'buro, on n'respond nin.
- Roland : Po fini, ele va mi d'mander di li vudi on verre.
- Pénélope : Vos n'avez rin a beure ?
- Roland : Dihez, vos vos pinsez è vosse mohone, vaner è vosse buro et lèyez mi téléphone trinkille
- Pénélope : Oh awè, vos avez rêzon, dji mi va so l'cop (*inteure divins si bûro*)
- Roland : Si ele continowe , ele sèrè vite a l'ouh. I n'a qui des ènnocints chal, des nawes, i volèt tot sins rin fé. Vèyans on po les programes po li saminne qui vint.....néni, néni.... nin çoulà. Les « Esperts », d'acwerd mins « Derick », si n'est qui po les vîles djins qui n'savèt nin dwermi et les cis qui comprinèt mons vite.... »Ine eureye câsi bin ».....volà ine saqwè bin, bin qui, les cis qui font li couhène, dji'n voreu nin magni adlé zels. I m'fât ine saqwè di djône, ine saqwè qui spite po mes programes mins ossi, ine saqwè qui sort foûh voye.(*tot alant avé li buro di Pénélope*) Pénélope avez'v houki li rèyâlisateûr ?
- Pénélope : (*sortant*) Awè moncheû, il a respondou qu'il alève vini come on cop d'aloumire
- Roland : Come on cop d'aloumire...il âreû intérêt a v'ni bin vite si i n'vou nin riçure on cop di tonire so s'tièsse. Veyans on po les notes so li houte des informâcions.....Pénélope

alez'm cwèri les buletins so l'houte des informâcions et dispetchez'v on po, nos n'avans nin qui çoulà a fé

Pénélope : Awè moncheû ( *va avé si buro et rivint* ) Dji n'el z'est trouve nin

Roland : Vos n'el z'est trover nin, çoulà vou dire qwè ?

Pénélope : Dj'a donné a moncheû îr les résultats divant d'enn'aler, vos les avez mettou so li bwert del finièsse. Si i n'y est pus, i sont suremint volé èvoye

Roland : Si i sont rèvolés si n'est nin sûremint cåse di mi

Pénélope : Di mi nin pus....c'est l'vint qui les a pris

Roland : Awè li vint..... il a bon rin li vint. Qui a mettou des fleurs so l' buro ?

Pénélope : Si n'est nin po çoulà qui les résultats sont rèvolés po l'finièsse, avez'v bin cwèrou tot costé ? Louki d'zos li paket å bwert di vosse burô

Roland : Volà les là ! Vos l'saviz qui l'esteut là ?

Pénélope : Nona, dj'a di çoulà sins saveur.... on p'tit cop d'tchance. Moncheû n'a pus dandji d'mi ?

Roland : Li réyâlizateur, c'est po ouy o d'min ? Seigneur, qui vos estez nawe

Pénélope : Mutwè et moncheû est trop spitant, tèlemint spitant qui rouvèye o i mette ses ahèsses

Roland : Pénélope si dj'apice måy on må d'cour, ça sèrè cåse di vos....dispetchez'v, sonner co n'feye après et lèyi mi téléphone trinkille

Pénélope : Dispetchez'v, dispetchez'v, dj'a l'timp, dji so chal disqu'a sîh eures adon, dj'a tot l'timp

Roland : Qui v'permette di m'responde come çoulà ?

Pénélope : I n'a des djous o moncheû d'vreut-èsse on po pus amiståve avou ses djins, si dji pou m'permette.

Roland : Dji'n vi permette rin et si i n'est nin chal divins deus minutes, vos irez l'cwèri avou vosse C4

Pénélope : Poqwè d'vreu-dje aler l'cwèri avou mi vwètture ? I n'a qu'a vini chal a pîd. Tote façon, i fêt trop streud divins li collidor po ine vwètture ( *a s'moumint là, on bouhe al pwète* ) Moncheû, on bouhe al pwète

Roland : Awè dj'el sé bin, dji'n so nin surdo

Pénélope : Eh bin, alez drovi

- Roland : Awè ! *(si r'prinant )* Dihez c'est vosse ovrèdje, dji'n so nin vosse vârlèt
- Pénélope : Oh awè, excusez'm. *(tot drovant l'pwète)* Moncheû est contint asteur. Bondjou Bertrand
- Bertrand : *(façon prézintateur)* Et asteur, vochal li pus nozeye di totes les sècrètères, mam'zelle Pénélope. Vos avez dè solo divins les ouys. Qwand dji'v veû, dj'a des fruzions tot li lon di'm cwer, dji'm sin radjoni di dîh ans.
- Pénélope : Rin qui dîh ?....mètchant qui vos estez
- Roland : Et mi dîh ans pus vî, si dji disrindje, dihez'l

## Sinne II

Roland – Pénélope – Bertrand

- Pénélope : *(tot bas a Bertrand )* Dji'v lé, i s'est co lèvé li cou divant come tofer
- Bertrand : Il est vinou à monde come çoulà.....li cou divant l'tièsse. Aler p'tite fleur
- Roland : Bon, avez'v fini vos basses mèsses ? Pénélope, dji'n vos a rin dimandé ?
- Pénélope : Sya moncheû, dji mi va so l'cop *(va avé si burô)*
- Roland : Bertrand, qui s'passe-t-i avou nosse novêl émission ? I parêt qui vosse ideye a-stu happé par li tchinne advèrse ?
- Bertrand : Qui volez'v qui dji d'âye, mi ossi qwand dj'a sèpou çoulà, dj'a toumé li cou al terre, portant dji n'aveû djâser a nouk. Savez'v qwè, por mi i n'a « on foyant » divins les meûrs.
- Roland : On « foyant » ! Les foyants c'est divins l'djârdin..... vosse linwe va on po trop reud qwand vos ètez al cantine, dji'm va prendre des dispositions po qu'on n'vude pus dè vin à diner
- Bertrand : Vos v'prenez po directeûr asteur ? Tote façon si vos loumez çoulà dè vin, vos n'estez nin malhâye a continter, dihez pus vite del pihote di canâri
- Roland : C'est todi les-cis qui trovèt a r'dire so tot qui n'ont rin è leu mohone
- Bertrand : Dji'm dimande qui est bin li « foyant » chal. Dji n'el pou creure, tot l'monde s'inme, s'étind, nos n'avans jamây on mot plus hot qui l'ôte...dji'n comprind nin
- Roland : Avez'v trové ine saqwè d'ôte po l'ramplacer ?
- Bertrand : Come çoulà, so l'cop ! Dji n'so nin producteûr o rèyâlisateûr, dji so animateûr
- Roland : Qwand minme, vos polez apwerter vos ideyes, i-n-a pus divins deus tièsses qui divins eune

- Bertrand : Si dji trouve ine solucion, n'arè-t-i ine p'tite ogmintâcion ?
- Roland : Sayi dè trover ine saqwè qui n'cosse nin tchir et qui rapwerte al mohone, avez'v compris. Dji n'a nin des çanses a hiner po l'finièsse come çoulà.
- Bertrand : Si dji comprend bin, dji deû djower a Mac Guyver (*sort*).
- Roland : Des çanses, des çanses, i n'djâse qui di çanses minme âs périodes di crise. Si ça continowe, c'est mi qui va apici ine crise et Tibât, vinrè-t-i ouy o dimin..... Pénélope
- Pénélope : Awè moncheû...volez'v bin siner les papis
- Roland : Avez'v houki Tibât ?
- Pénélope : Cèrtinnemint, i m'a di qu'il alève vini so l'cop.....tot fant ine bâye
- Roland : I dwermève co.....come todi.....
- Pénélope : o i tuzève fwert po ine novèle émission et çoulà l'a mutwè nâhi
- Roland : Nâhi o nin, i kimize à m'fé potchi foûh d'mes solès cis-là. Qui prenne asteume à s'tièsse

### Sinne III

Roland-Tibât-Pénélope

*(On bouhe al pwète)*

- Roland : Riprinez vos papis, dji r'louk'rè çoulà pus târd, a mi âhe
- Pénélope : Mins moncheu, dji deû les évoyi divant cinq eures
- Roland : On a co l'timp, vos ovrez qwand minme disqu'à sîh, c'est vos qui l'avez di. C'est poqwè les papis ?
- Pénélope : Nos d'vans payi les gâgnants del dièrinne émission, volà treus meus qui rattindèt leus çanses et si ça continowe, nos alans aveur les hûssis
- Roland : (Tot r'loukant les papîs) Note po pus târd, fé des émissions mon tchir qui li « 71 », a c'trin là, nos n'arans pus rin divins nos kèsses
- Pénélope : Vos rouviez li compte qui nos avans....
- Roland : Teyez'v, çoulà c'est po nosse brude..... moussi bin vite divins vosse burô (*on bouhe à l'oûh*).
- Pénélope : On a bouhi al pwète.
- Roland : Dji sé, aler bin vite è vosse burô. Intrer !

- Tîbât : Bondjou Roland, vos avez dandji di mi ?
- Roland : Ah afin, vos estez dispiertez, dji rattind todi vos ideyes po l'émission suvante. Divins treus samennes li « cour est divins l'pré » si termine et nos n'avans rin po l'ramplacer
- Tîbât : Ine émission di couhène mutwè qui çoulà.....
- Roland : Dèdjà fet « l'eureye est câsi prête », avez'v rouvi çoulà qui nos avans avou l'feu divins li studio
- Tîbât : Ine émission so les marièdjès, mutwè qui ça va roter
- Roland : Les francès l'ont dèdjà fet, s'esteut bièsse et les feumes là divins, fât nin ènnè djâser, des vreyes cherpins
- Tîbât : *(si grettant li tièsse)* Dj'a ine dièrinne ideye mins c'est on po délicat
- Roland : Dihez todi, po çou qu'on a a piète
- Tîbât : Ine émission so les étèremints, nouk a tuzer à çoulà. Volà li révolucion po nos programes
- Roland : Dihez, vos riez d'mi vos n'avez rin di pus djoyeu, çou qui n'fât nin étinde.
- Tîbât : Attendez, si n'est nin des étèremints avou des mwerts o les djins tchoulèt, dji djâse chal d'étèremint di veye di djône ome o djône feye. Vos n'savez nin çou qui pou si passer
- Roland : L'ideye est bonne mins, å djou d'ouy, i n'a pus bêcop qui s'mètèt li cwède å atrè, qui dè contrâve, i vikèt pus ureus divins li pèchi qu'avou ine cwète âtout del anette
- Tîbât : Dji so d'acwerd avou vos mins, mètans on bê prix po assètchi les candidats
- Roland : Dji veû dit-chal : « prumi lot : on voyièdje å solo avou tot compris, l'ôtel, les déplacemints et tot l'restant »
- Tîbât : Divant, i fâreû égadji des djins po djower li rôle des candidats, istwère d'assètchi les vreyes candidats. Qwand nos avans mètou so veye li djeu « Tot l'monde vou si plèce » on aveû égadji des djins po djower li rôle des candidats et ça n'aveu rin costé a pârt, on p'tit diné po les treus djous d'inregistremints
- Roland : Lèyez'm tuzer.... l'ideye n'est nin si mâle, vos n'avez rin d'ôtes è l'tièsse ?
- Tîbât : Si n'est nin dèdjà si mâ, qu'ènnè pinsez'v ?
- Roland : Vos n'avez rin d'mî ? Dj'inm'reû qwand minme trover ine saqwè qui rapwète al mohone . Ine novèle émission di tchansons mins avou des djins qu'on déguîz'reu come li vreye tchanteur et i d'vrît chanter come lu

- Tîbât : On concour d'immitâcion. Ça va èsse malâheye, tot l'monde ni sé nin immiter o tchanter. Houtez mi prumir ideye, c'est li bonne
- Roland : Bon, vos avez cwate blank mins, dj'a des dotes
- Tîbât : Il est todi pus âheye di doter qui di si hazârder.... édon
- Roland : Houtez on po chal, li bê djâzeû. Vât mî d'èsse sourdo qui d'ètinde çoulà
- Tîbât : Vos d'vez nin vos prindre po li grand patron mins, di houter âtout d'vos. Saveur miner c'est saveur houter. Maribelle, mi feume, m'el dihève co l'ôte djou : « on patron divreut todi houter ses ovris divant del z'est kimindés »
- Roland : Lèyi on po vosse feume divins ses marmites et sahi di trover des ôtes ideyes....si vos n'estez nin trop nâhi
- Tîbât : On rèyâlisateûr qui deû trover ine solucion po on prôducteûr qui n'est mây contint.....què mesti (sort)
- Roland : Co onk qui vous v'ni fé di s'narène chal : « Li chef c'est mi mins, c'est mi feume qui kimande » volà çou qui l'est.
- Pénélope : *(Sortant di s'buro)* Moncheu Roland, Bertrand imm'reû d'viser avou vos
- Roland : Qui li fât-i co ? Fez-l intrer
- Pénélope : Intrez Bertrand
- Bertrand : *(bref)* Dji sé bin qui vos n'avez dè timp à piète, dj'irè dreut à but
- Roland : Come on djoweu di football....néni
- Bertrand : Dji'n a co rin dis et vos m'dihez dèdjà néni
- Roland : Si c'est po ine ogmintâcion, c'est néni. Totes les âneyes vos riv'nez so s'kèsse là et totes les âneyes ça sèrè li minme response.
- Bertrand : Bon, dj'irè prôpozer mes chervices a ine tchinne adverse qui m'pây'rè pus po prézinter les novêles émissions
- Roland : Volà pus di vint ans qui vos prézinter « attincion di nin toumer » et vos vôtis fé ot'tchwè ôte pàrt
- Bertrand : Poqwè nin, volà pus di trinte ans qui vos fez li minme afêre et vos n'avez mây cwèri a fé ot'tchwè. Vos d'vez vos annoyi o adon, vos estez bin payi ?
- Roland : Dji gâgne bin mi veye et dji'n dimande rin d'pus. Volez'v prindre mi plèce avou tos ses mèhins po ine saminne ?

- Bertrand : Poqwè nin, vos veûrez come c'est plèyant d'èsse kiminder par ine saqui qui n'arête nin di grogni po tot et po rin ; n'estez'v nin nâhi al fin del djourneye ?
- Roland : Si n'est nin l'ovrèdje qui m'nâhi mins, des apotikères come vos qui volez tot sins rin fé ; tot l'monde est capâble di prézinter ine émission qui ça seû al tv o al radio, vos n'estez nin ûnique
- Bertrand : Adon, vos estez d'acwerd di prézinter a m'plèce
- Roland : Li chef nin prind nin l'plèce di ses ovrîs mins vos, vos prézintrez li prochainne émission qui nos alans mète so pîd, ine saqwè qu'on a jamây fet, vos metrez del djoye divins les ètèremints
- Bertrand : Li solo tape trop fwert ouy. Vos riez d'mi ?
- Roland : Vos metrez tot è ouve po animer les ètèremints. Vos alez veur come c'est amuzant
- Bertrand : Dji r'fuse ! Dj'inme bin rire mins nin avou li mâleur des djins . Vos estez vrey mint bon à tot po fé del hoûte
- Roland : Dji'n veû nin çou qui n'a di djinnant là divins ; tot les djous on fièsse les ètèremints. I n'a qui buvet a roler dizos l'tâve, i n'a qui corè tot nou po fièsti çoulà
- Bertrand : Et i n'a des cis qui tchoulèt cåse qui z'ont hérité dè magzô.... o des dettes
- Roland : Attendez on po, i m'sonle qui nos n'estans nin so li minme ideye. Dji djâse chal d'ètèremints di veye di djône omes, nin les cis qui vos l'pinsez
- Bertrand : I falève kimincer par çoulà et qui gâgne-t-on là d'vins ?
- Roland : Volà li kestion qui tot l'monde à so les lèpes, les çanses. Vos n'avez nin assez avou vosse meûs ?
- Bertrand : Dji'n djâse nin di mi mins, des candidats, qui vont-i gâgni ?
- Roland : Les cis qu'ârans li mèyeusse note, ârans leu swèreye di djône ome o djône feume payi
- Bertrand : Poqwè nin li marièdje ?
- Roland : Néni, nin çoulà, li marièdje c'est li pire ètèremint, i pierdè leu liberté . Sins l'saveur, i intrèt divins ine prihon po tote leu veye.....pove cwer
- Bertrand : Et leu seûle liberté, c'est li divorce. A pwerpos, on poreû fé on djeu so çoulà, fièsti les divorces, dj'a les pinses qui n'âreû pus qui des ètèremints
- Roland : Et ça nos rivinreû co pus tchir. Kimint alez'v prézinter li novèle émission et avou qui ?



- Bertrand : Kimint çoulà « avou qui « ? Li prezintateûr vedette ...c'est mi et mi seûl, dji n'a mézâhe di personne d'ôte
- Roland : Çoulà va candji, les djins inmreû v' veur avou ine bêle djône feye adlé vos qui di toti veur vosse narène et d'pus, si elle est « sexy » les djins r'loukrans co pus vite l'émission. Dji n'voreû nin mi mokez d' vos mins, vos prinez di l'âdje come tot l'monde et d'pus, les djins si dimandèt poqwè vos estez toti seû, mây avou ine bêle djone bâcèle à vosse brès.... estez'v on po soukré.....so l'bwert ?
- Bertrand : Dji'n vi permette nin di'm djudji so s'kèsse là et di tote façon, come dihève Sacha Guitry : « Dji so disconte les feumes, tot disconte. »
- Roland : Tint mî vât, adon nos estans d'acwerd, dji'v prezint'rè vosse novêlê kipagne.
- Bertrand : Pace qui vos l'avez dèdjà tchuzi sins mi dimander mi avi, on veut bin qui est l'patron chal
- Roland : Dji n'a co nin tchuzi et si vos volez, vos vinrez li djou di « casting », come çoulà, nos sèrans d'acwerd so li cisse qui sèrè a vos costé
- Bertrand : Ine p'tite kestion qui passe po m'tièsse insi, ça n'va nin bahi mi meûs ?
- Roland : Po v'dire li vreye, si n'est nin cåse di çoulà qui ça va candji mins, cåse des spågnes qui nos d'vans fé. Come vos savez, nosse payi est divins ine mâle passe, nos avans co li tchance qu'on n'sert nin nosse télévision. Nos d'vans nos mète li cingue po sorti fouh d'çoulà
- Bertrand : Tot égardjant ine bâcèle qui fâre payi, dji'n sèpe pus rin. Tot y tuzant bin, i n'a qui les cis qui n'fans rin et qui sont co pus ureus qui les cis qui ovrèt. A ponne qui nos avans on euro di pus divins nosse potche, on nos l'happe. Dji'm dimande a qwè ça chève co d'ovrer
- Roland : Vos vinez del dire, a payi les cis qui n'fans rin... et nos foncires mins, teyans nos, si ça s'raprind qui nos avans dit çoulà, on sèreû capåbe di nos mète li police à cou
- Bertrand : Poqwè, nos n'avans pus rin a dire ?
- Roland : I fât r'louki a deûs feye. Moncheu météo a avou li mâleur dè dire tot haut çou qui les ôtes pinset tot bas, asteur il est divins tot displis et on lî cwire des istwères di tos costés
- Bertrand : Ni dit-on nin qui nosse payis est libe et démocrâtique o l'on pout dire si façon di pinser
- Roland : D'avance mutwè, asteur, s'est on pô div'nou come li Russie à timp del freude guêre.....riv'nans a nosse istwère, vos aler tuzer a ine saki po li novêlê l'émission. On poreû diner ine tchance a ine djin dit-chal, qui n'a mây fet del télévision, qu'a toti

ovrer divins li sipèheur, ine djin po qui li mesti d'animateur poreu-t-èsse ine libérâcion et d'pus, on ârêt nin mèzâhe dè fé on « casting » et surtot, nin l'payi

- Bertrand : Ine libérâcion o ine punicion.....por mi. Si i fât qui dji sètche on aprindice a m'cou po rin dire, ça s'reût mî qui dji fasse tot mi minme. Vos n'tuzer nin a timp qui çoulà va prendre del mète a corant, dè li aprindre tos les p'tits acostés dè mesti sins saveur si èle va sèpi tot so l'cop, ni rouvihans nin qui des ènnocints so l'terre i n'a pus qu'on nel pinse
- Roland : Assez djâsez asteur, dj'a trové li cisse qui vos prendrez avou vos.... Jwana, li p'tite grimeuse, elle a todi sondji di prézinter ine émission avou vos, dinans li si tchance
- Bertrand : Vos ni tusez nin, elle est luskette et d'pus, èle ni sé nin djâser divans ine caméra, ça va èsse ine catastrophe. Si vos volez fé ine émission po rire, vos avez bin taper
- Roland : Dj'a di leye et nin ine ôte et d'pus, ele n'est nin pus bièsse qui vos
- Bertrand : Co del tchance por mi qu'elle est sutie
- Roland : Asteur vanez foûh d'tchal et mètez'v a l'ovrèdje et surtot, djinti avou leye
- Bertrand: Bon mins, si ça toune a vinègue, ça sèrè di vosse fâte
- Roland : O del vosse pusqui vos l'ârez d'zos vosse direction, pinsez y
- Bertrand : Çou qui n'fât nin étinde, dj'âreu d'voû m'fé curé (*sort pwète buro*)
- Roland : Si on s'lè kidure, i-n-a qui montèt tot fî dreût so vosse tièsse. Qui prend les décizions chal....non mins.....
- Pénélope : (*tot sortant di s'buro*) Moncheû, vosse fré rattind a l'intreye, deû-dje dire qui monte ?
- Bertrand : Mi fré, qui vint-i fé chal ? Dihez'l qui print les monteyes di po-drî. Si i passe divins li grand colwer totes les djins vont prendre sogne
- Pénélope : Bin moncheû, dji va li dire
- Bertrand : Sohètans qui n'âye nin ine mâle novêlé a miannonci, avou si mesti, si n'est nin çoulà qui manke. Por m'pârt, di nosse costé, on n'sâreut pus aveur des mâles novêles, nos estans orfilins tos les deus
- Pénélope : Il arriv ! Avez'v dandji di mi ?
- Bertrand : Nona, vos polez moussi divins vosse bûro. Qui li fât-i co ? Des meûs qu'on n'el veut nin et volà d'on co, il amousse chal sans prévni. Pénélope, qwand i sèrè chal, dji'n vou n'veur personne, avez'v étindou
- Pénélope : Bin moncheû

## Sinne IV

Hinri – Roland

*On bouhe al pwète*

Roland : *(tot fan li sègne di creûh)* Intré !

Hinri : Bondjou fré, alez'v bin ?

Roland : Salut cwerbâ, dispoye li timp qui dji'n vos a vèyou, ça va-t-i ?

Hinri : Néni ça n'va nin. Dji'n sé nin çou qui s'passe po l'moumint mins, les djins ni volèt pus morri, çoulà cåse del médecine. On n'arête nin li progrès, les djins vikèt di pus è pus vis et por nos, croque-mwert, nosse botique va toumé a cou. Qwand dj'étind al tv o al radio djâser d'immortâlitè, dj'ènn'a des fruzions. Fât-i qui les djins viket pus lontimp? Ine feye qui vos avez fè vosse timp, lèyer vosse plèce às ôtes

Roland : Vos 'nn'avez d'bonne vos, insi vos vos rafiyî qui les djins toumèt mwert rin qui po vosse comèrce

Hinri : Dj'a dandji dè viker ossi, onk o deûs mwerts par saminne, dji'n dimande rin d'trop, ça n'fêt nin di twert. Tinez, poqwè nin, in'avion qui si s'prâtche avâ chal o on trin qui bake di ses rayes, ine trintinne di towés et li comèrce riprind

Roland : C'est qwand minme on po pus qui onk o deûs. Si vos estez vinou chal po djâsez di çoulà, vos ârez mî fet d'aler amon l'curé, mutwè qui lu, a kèkès adresses di cantes

Hinri : C'est come mi, pus on ètèremint nin minme on marièdje. Di nos djous, i n'ont minme pus mézâhe di s'marier, come dihèt les francès, i-n-a li « patche » o ine saqwè insi. I s'mettèt èssonle et vikèt divins li petchi. Si nos parints è-st-i co chal, i n'sèreû nin d'acwerd avou tot çou qui s'passe asteur.

Roland : On « patche », poqwè ni dihèt-i nin s'aplakî, on comprendreut mî. Alez fré, rimetez'v, volez'v on p'tit verre, çoulà riv'mettret on po d'attaque. Ine bire, ine gotte, di l'èwe.....

Hinri : Ine bîre, çoulà mi fê pinser a m'mesti.....Ine « mort subite » si vos avez çoulà

Roland : Dji'm va veur... *(tot bas)* Co del tchance qui n'a nin diminder li vève Clicotte. Pénélope, qu'avans-gne divins nosse frigo po beure ?

Hinri : Vos avez on frigo, qui c'est bê on frigo, ça wåde les cwers à fris

Roland : Arestez dè djâser ovrèdje. Pénélope, estez'v sourdote, qu'i n'a-t-i divins li frigo ?

Pénélope : Di l'èwe, coca et on rèstant di limonåde

Roland : Nos n'avans pus del bîre ?

- Pénélope : Moncheû a vudi li dièrinne îr po l'apéritif
- Hinri : Veyez'v, i n'a pus rin po m'êdi, c'est mi asteur qui va morri.....di seû. Fré, avou vos kinohances, n'avez nin ine solucion a mes méhins ?
- Roland : Ine solucion, i m'fât dédjà bin tot po fé roter li botique chal adon, si n'est nin mî qui poreut vi dinez consej
- Hinri : Et mi qu'esteû vinou chal po trover on po di rik'fwèrt
- Roland : Dji'n va nin touwer les djins po v'continter tot d'minme
- Hinri : Dji'n v'dimande nin çoulà bin qui, ça rézoldreû mes mèhins. Avou vos martchands di gazettes et di novêles, vos porriz on po mi mète so l'voye et come vos ovrer al tv, dji'n porreû nin fé on po di réclame por mi botique.
- Roland : Dji veû çoulà dit-chal, après l'annonce d'ine catastrophe mins, avez'v des çanses, bêcop çanses ? Vos savez, chal po trinte sicondes, vos d'vez compter 19000 euros
- Hinri : Hein ! Dji so dèdjà so les djinos adon si dji deû payi ot'tant, dji sèrè vite so m' cou. Pryi po qu'ine catastrophe arrive bin vite ; dji deû viker ossi.
- Roland : Houtez fré, vosse âme est co pus neure qui vosse costeume, candji di mesti ; n'avez'v mây tuzer âs marièdjès, c'est pus djoyeus
- Hinri : Çoulà mi candj'ré nin, li costeume est todi neur. Mutwè qu'avou des rabatèdjès so les wahès, ça assètch'rè les djins, mons 50% so les wahès et si vos morrez divans vosse dâte, vosse ètèremint est po rin.
- Roland : C'est seulemint qui vos pôrrez serrer botique. Po rentrer divins vos frès i fâre fé payi les bwèssons et èco, vos n'dite qui des biestreyes. Li mwert ni si kiminde nin savez. Tot tuzant bin, dji pinse qui dj'âreû mutwè ine solucion
- Hinri : Fré, vos mi sètchi del sipèheur, dihez bin vite, n'a-t-i on grâve accidint po l'moumint, des mwerts, des blèssis.....dihez, dihez
- Roland : Dimaner keu, dji volève v'dire qui po l'moumint, nos estans so l'ideye d'ine novêlé émission qui djâse d'ètèremint
- Hinri : Oh po çoulà, vos polez m'fé confyince. Les ètèremints c'est mi rèyions, couronnes, fleurs, etc....
- Roland : Nona, nin des ètèremints come çoulà, dji volève v'dire des ètèremints di djônes omes o djônes feyes
- Hinri : Awè, awè, des djônes qui s'touwèt so les voyes câse des accidints o qui morrèt câse del drouke o dji'n sé qwè, qui dji veû voltî çoulà. C'est bin çoulà fré, vos estez divins l'bon et mi, dji'v donne des ideyes po vosse émissions

- Roland : Décidémint, vos n'tusez qu'a ça, arester on po non Dihu
- Hinri : Dji'n v'comprend nin, vos m'djâzez d'ètèremints et asteur, vos m'dihez li contrâve
- Roland : I n'a deus sorts d'ètèremints : Les cis avou les mwerts et les cis avou les vikants....comprenez'v ?
- Hinri : (*dotant*) Dihez, vos n'estez nin on po nâhi ?
- Roland : Dji voû dire des ètèremint di veye di djône ome, des cis qui vont fé li grand nouk après.....
- Hinri : po s'pinde ?
- Roland : Dihez, vos l'fé èsprès ? Des cis qui vont fé potchi l'bouchon adon, i vont ètèrer leu djônese po d'bon
- Hinri : Oh çoulà, si n'est nin amuzant. Dj'inme mî o ont risint les sintimints, o li famille tchoule li mwert, çou qu'on n'wmèze dire di zels di leu vikant. Là, dji poû v'dire qui n'a a beure et a magni
- Roland : Come divins tos les ètèremints mins chal, i n'fât nin rouvi qui di timp in timp, i n'a des djônes feyes qui vinet fé on ~strip-tease~.....Oh escusez, dj'aveû rouvi Martha. Dji'n vôreû nin fé des displis divins vosse manètje.
- Hinri : Surtot qwand i-n-a on d'ètèremint, elle est todi adlé mi po m'édi mins, si ele mi trouve divins ine istwère come çoulà, dji creû qui c'est vos qui vinrè a mi ètèremint
- Roland : Elle est djalote come on pou
- Hinri : Dji n'wèze r'louki ot'pârt qui li wahè et si dj'a l'mâleur dè rik'fwerter ine vève, tot dreut elle est a m'cou po m'rihoukî à l'orde
- Roland : C'est bê l'amour mins, i n'a de moumint qui s'est soyant. Vât mî por vos qui por mi.
- Hinri : Ureûsemint qu'elle est là. Tot l'monde cwire di l'ovrèdje mins nouk ni vou v'ni overer à funèrarium. Portant, i fêt freud avou nos glacîres qwand i fêt tchod et qwand i fêt freud, nos avans li broûleû di wahès, bref nos avans totes les âhèyistés minme del bêle muzique....Chopin, Bach... mins, nouk ni vou v'ni
- Roland : Vos avez des rêzonnemints bizâres, i n'a de feye qui dji'm dimande si vos estez bin m'fré. Dédjà èfant, vos vèyi tot è neur et mi, tot è rose. Nos n'avans vreymint nin li minme timpèranmint. Come vos n'avez nin trop d'ovrèdje po m'moumint, ça n'vos direû nin d'aler on po èdi nosse prèzintateûr Bertrand. I deû s'occuper del novèle émission so les ètèremints, vos porrez li diner kèkes conseys. Dji'v prévins, il est tiestou mins c'est on brâve valet. Attindez, dji'm va vos l'prèzinter. Pénélope, houki on po Bertrand
- Pénélope : (*di s'buro*) Bin moncheû, dj'el fê so l'cop

Hinri : Pénélope, vos avez ine sècrètère qui s'loume Pénélope....qu'est bê p'tit nom, c'est come li cis d'm aguèsse.

Roland : Vos avez ine aguèsse ? Vos d'vriz arester di roter po-drî les wahès

Hinri : Dji'v djâse di l'aguèsse....l'ouhè qui dj'a trové et aclèvé, dji'n djâse nin di mes pîs

### Sinne V

Roland – Hinri – Bertrand

Roland : *(on bouhe al pwète)* Intrer ! Bertrand, dji'v prezinte Hinri mi fré

Bertrand : Vos m'avez dit « ine djône feye » po prezinter l'émission, nin onk del famille Addam's

Roland : Hinri, qui volà va vos consi so l'façon di'v moussi po l'émission

Bertrand : Dji creû qu'èle n'irè nin fwert lon l'émission. *(mokâ)* Vos vinez d'on ètèremint agad'lé come çoulà ?

Roland : Bertrand ni'v mokez'v nin di'm fré, Hinri est croque-mwert et on reye nin del mwert

Hinri : Vos veyez bin qui ça n'irè nin inte nos deûs, moncheû est trop moderne di pus, i reye tot l'timp, mi feume li r'louke tot les djous qwand i prezinte li djeu « Attincion dè nin toumé » qwand on djâse di mwert, on n'reye nin, fât èsse sèrieûs

Bertrand : ~Les djins sèrieûs ni sont nin tofer les cis qui n'rièt mây~ Djin sé pus qui a dit çoulà

Roland : I n'a pus divins deûs tiesses qui divins eune adon, vos alez ovrer tot les treus essonle

Hinri : Kimint çoulà tot les treus, nos estans qui deus po l'moumint

Roland : Awè mins Bertrand va trover ine bêle et nozeye djône aprindice po prezinter avou lu l'émission

Bertrand : Agadlé come çoulà, tot çou qui nos ârans, c'est ine bèguène. Nos alans fé pus vite vaner les djins qui di les assètchi, dimanans on po sèrieûs, minme si dji deû rire po l'moumint

Roland : I n'va nin prezinter avou vos, il est là po vos êdi divins vosse prezintâcion, çou qui fât dire qwand vos sèrez a l'antenne, kimint vos kipwerter

Bertrand : Vos n'alez nin m'apprendre mi mesti, volà 20 ans qui dj'ouveure adon.....vos savez çou qui dji pinse di ses conseys

Hinri : Si vos n'avez nin dandji di mi, dji'v comprind bin.....tote façon, i n'a nouk qu'a dandji di mi..... minme les mwerts

- Roland : Teyez'v , vos alez ovrer essonle. Bertrand, vos alez bin vite m'cwèri li djône feume qui va ovrer avou vos
- Bertrand : Nos n'vans nin li tchûze, afin, çou qui l'patron vout, li Seigneur est a ses costés...suvez'm...
- Hinri : Insi, vos estez prézintateûr, vos avez on bê mesti. Ça n'vos direû nin di prézinter les ètèremints avou mi. Di pus, vos estez kinohou, nos ariz bêcop di sucès
- Bertrand : Di plus è plus pleyant. Loukez'm, a-dje ine tièsse d'ètèremint ?
- Hinri : Nona mins, avou mes conseys, on poreut arrindji çoulà.
- Bertrand : Si vos estez come vosse fré, on va bin s'plère. Qwand i l'a nin al tièsse, i l'a ôte pàrt
- Roland : Qwand li patron l'a al'tièsse, c'est qui ça va roter o adon, I n'est pus l'patron
- Hinri : Avou mi, on n'si plet nin.....dji'n kinohe nin li rire. I fât dimaner sérieûs divins mi mesti
- Bertrand : *(tot sortant dè buro)* Y a del Djoye, bondjou, bondjou les arrondes, i n'a del djoye
- Hinri : *(l'suvant tchante l'Avé Maria )*
- Roland : Bin volà çou qui fât, ovrer divins li bone oumeur, ovrer tot tchantant, s'est si pleyant

## SINNE VI

Roland – Tibât – Pénélope

- Roland : Dji d'vreû qwand minme tini c'est deus là à l'ouy. Pénélope, vinez
- Pénélope : Vos m'chal moncheû, qui n'a-t-i po vosse chervice ?
- Roland : Di timp in timp, vos vos irez v'porminer, fé les cwases di rin et vos vinrez m'dire kimint mi fré si kipwète et ossi, kimint les ôtes sont avou lu
- Pénélope : Mi porminer, vos m'dihez tofer qui dji n'so nin chal po rin fé et vos volez qui dj'âye mi porminer
- Roland : Si dji'v diminde çoulà, c'est po tini mi fré à l'ouy . Vos ovrez por mi et ni pinser nin qui vos n'fé rin. Asteur à l'ovrèdje

*Pénélope rinteure divins si buro*

- Roland : Wice alez'v ?
- Pénélope : Continuwer li corri , dji deû responde às lettres
- Roland : Lèyi les lettres po pus târd et aler v'porminer, c'est in'ordre

- Pénélope : Bin moncheû mins, si i n'a di ritârd ni vinez nin grouler
- Roland : C'est bon, à l'ovrèdje asteur
- Pénélope : Bin moncheû (*va avé si buro*)
- Roland : Néni por là, alez v' porminer et pus vite qui çoulà et ni rouvriez nin çou qui dj'a di
- Pénélope : Bin moncheû (*tot sortant creûh Tibât*) Bondjou moncheû
- Tîbât : Bondjou Pénélope, vos estez todi ossi nozeye, Roland a bin del tchance di v' z'aveur come sècrètère. Wice alez v' come çoulà ?
- Pénélope : Moncheû m'a diner l'ordre d'aler m'porminer, adon dji'm pormine et après i vin'rè co dire qui dji'n ouveure nin. Disqu'à torade Moncheû (sort)
- Tîbât : Vos payi li personnel po si porminer asteur ? Novê çoulà
- Roland : Si nin çou qui vos tuzer, dji'm va tot vos dire. Po li novê projet d'émission po l'rintreye, dj'a mètou mi fré so l'cop. Bin sur, i vint nos êdi po rin. Dji d'hève d'on, qui m'fré va dinner kèkès conseys à nosse animateûr vidette et dj'a d'mandé à Pénélope del z'est tini à l'ouy
- Tîbât : Vosse fré mins, n'avez v' nin dit qu'il esteût croque-mwert. Vos n'alez nin m'fé des émissions so les cis qui font mâleur di leu cwer, nos n'avans dédjà assez avou les informâcions al tv
- Roland : Nona nos wardans li prumir ideye avou des ètèremints djoyeus o tot l'monde si plet bin
- Tîbât : Vos estez d'acwerd avou mi adon, nos alans fé ine émission èco pus bièsse qui les ôtes.
- Roland : Vos savez, c'est çou qui les djins cwèrèt....pus c'est bièsse et pus les djins inmèt çoulà. I n'fât nin cwèri çou qui n'a divins leus tièsse
- Tîbât : Portant, qwand dj'a veyou vosse fré, dj'a tuzé zo l'cop qui vos aviz candji d'avis
- Roland : Hinri ouveure divins les wahès, si n'est nin po ot'tant qui fât tuzer so l'cop al mwert, nos alans fé ine émission so les djins qui vont fé potchi l'bochon. Divans çoulà, i ètèrèt leu veye di vî djone ome o djone feye et si n'est nin trisse. Adon, nos dimandrans âs ôtes di diner ine note âs candidats et l'cis qu'âront li pus di ponts gângn'rans on bê voyèdje mins rin qui li voyèdje, po li rèsse, c'est zels qui payirans. Tint a pwerpos di çoulà, qui porreut-on offri come voyièdje ?
- Tîbât : Vos 'nn'avez des bonnes vos, vos plakez çoulà insi al narène et nos l'avans rin dit a nosse directeur. Vos estez on bê cadet



- Roland : Si on voyèdje est trop tchir offrans adon, ine machine a rinetti les hyières. Vos savez bin qui nos, les omes, n'inmans nin di fé çoulà
- Tîbât : Poqwè nin on fier a ristinde, c'est mon tchir
- Roland : I n'fât qwand minme nin qu'on s'moke di nos. Nos verrans çoulà pus târd
- Tîbât : Pus târd, pus târd, ni rouviez nin qui c'est mi li rèyiliseûr et i m'fât totes les donnes divant di lincer l'émission di pus, i nos fât trover des candidats, çou qui vou dire qui fâre prindre asteume car, i n'ârè suremint des cis qui vont inventer n'import qwè po sayi d'aveur li lot.
- Roland : Dimaner pâhule so s'kèsse là, nos prindrans des acwerds avou les mohones di veye po veur les registres nationâl , i n'ârè nin des tourseus et si les candidats candjèt d'avi, nos riprindrans li lot.
- Tîbât : Bon qui vas-st insi mins, attincion a vos et a vosse fré
- Roland : Feyez'm confyince, ça va roter
- Tîbât : Dj'el sohète ( *tot sortant* ) Dihez, vos avez avou rêzon di prindre vosse fré chal po on p'tit timp. Si i n'a ine saqui qui toume mwert, nos n'ârans nin a cwèri on croque-mwert, nos l'avans dédjà d'zos l'min. Ine télé mortâlitè, volà ine saqwè qui dji n'aveu nin tuzer.

**FIN AKTE I**

## AKTE II

## SINNE I

Jwana - Bertrand

*Bertrand inteure divins li buro di Roland suvou di Jwana*

Bertrand : Roland, estez'v là ? Bon vos, dimaner chal et n'boudji nin

Jwana : Dimaner sins rin fé, ça va éssè deure por mi, dj'a todi des wèsses è cou. Insi come vos m'avez espliquez, dji deu fé ine émission so les étèremints di djônes qui vont fé potchi l'bochon, nos divans cominter les pwerpos des candidats.....rin d'pus àheye

Bertrand : Vos, vos n'dihez rin, li prézintateûr vidette, c'est mi . Vos, vos n'ârez qu'a fé on bê sorire et moti li mons.... » soit belle et tais toi »

Jwana : I 'm sonle qui dj'a co hérité dè rôle di l'ènnocinne, moncheû n'est nin po l'égalité des seksex. Estez'v mysogine ?

Bertrand : Mi....mysogine....leyez'm rire, dji so li Valentino del mohone mins, dji deû protédji mi p'tite djin. Totes les feumes sont reudes sottès di mi mins, dji n'a nin di timp a piète et volà poqwè dji so come çoulà et pwis, dj'inme mi warder mi rinomeye di prézintateûr.

Jwana : Bref, vos vos pinser sorti del cwisse di Jupiter. Vos estez bin turtos les minmes vos les omes.

Bertrand : Ni vinez nin fé di vosse narène, c'est li prôducteûr qui m'a oblidji dè prindre ine saqui po prézinter li novèle émission. Po m'pârt, dji n'a dandji di personne po fé mi mesti

Jwana : Moncheu si kinohe divins li monde di l'audio visuel, adon, permettez'm di'v diner on consèy po qui n'vos passez nin po on énnocint.

Bertrand : Vos.... mi dinez on consèy, vos alez m'fé rire et qu'alez'v m'dire mi bone âme ?

Jwana : Serrer vosse brâyette, on direut qui n'a on mwert

Bertrand : (*Djinné* ) Oh.....oh....vos avez vos ouys tot costé

Jwana : Néni, tot simplumint al bonne hoteur. Dj'âreu inmer vos veur insi prézinter l'émission, dji veû dédjà les tites dit-chal : « I n'a nin qui les étèremint di veye di djônes omes, i n'a on mwert adlé li prézintateûr »

Bertrand : Et ça vos fet rire.....énnocinne

Jwana : Dji'n va nin tchouler

Bertrand : Prinez asteume, çoulà poreû vini, dji n'inme nin qu'on s'moke di mi

- Jwana : Si vos n'volez nin qu'on reye di vos, r'louki kimint vos v'moussi et surtot, kimint vos estez cwèfé, vos avez li tièsse d'onk qui vint di s'dispierté ?
- Bertrand : Et vos, li tièsse d'ine édermowe
- Jwana : D'acwerd, dji veû o çoulà va nos aminer, prochin cop, dji clos m'betch et dji'v lèrè aler avou vosse brâchette à lådje.....nos verrans come çoulà qui vos estez ine ome, afin, si i-n-a ine saqwè a veur
- Bertrand : C'est tot asteur, dji'n voû pus vos étinde, avez'v compris
- Jwana : Bin chef.

## Sinne II

### Les minmes pus moncheû météo

*(on boûhe al pwète)*

- Bertrand : C'est suremint li producteur, teyez'v asteur
- Jwana : Avez'v dédjà vèyou ine saqui bouhi a s' pwète po intrer amon lu ?
- Bertrand : Intrez ! C'est vos Luc ! Kimint alez'v ?
- Luc : Mâ, fwert mâ, dji'n sé pus çou qui dji deû fé
- Jwana : Avez'v des méhins ?
- Luc : Des mèhins.....çoulà divins di pé è pé. Nos fans on mestis o nos d'vans rak'sègni les djins mins, qwand on n'a li mâleur dè dire ine saqwè di contrâve so certinnes djins, si n'est pus li minme afère. On v'cwire displi, vos pwertez plinte et c'est co vos qu'estez li mâva et qu'estez punis. Nos vikans divins on drôle di monde. Po fini, i fâre si lèyi tower o roter so les pîs sins rin dire. Li prézidint voû mi mette à l'oûh. Des âneyes et des âneyes qui dj'a fê mi mesti sincieusement et câse qui dj'a avou l'has di cour dè dire çou qui dji pinsève, m'volà so l'bloc
- Jwana : Rapâftez'v, ça va s'arrindji. Lèyi dwermi l'istwère et vos veûrez qui ça pass'rè. A pwerpos, qu'avez fet po ènn'arriver là ?
- Luc : C'est on po délicat a raconter, ot'tant d'pus dji'n sé nin kimint vos alez l'prendre
- Jwana : Dji veû.....ine istwère d'ome o d'feumes
- Bertrand : Pus vite ine istwère d'omes come dj'a pou étinde
- Jwana : Vos moncheû météo, vos estez po les omes ? Nol djins n'est parfêt. Si vos trovez vosse boneur là divins, tint mî vâ por vos et lèyans dire les mâles linwes

- Bertrand : Vos n'comprenez nin, nos djâzans nin di çoulà. On djou al nute, ènnè ralant amon lu, Luc a stu aksus par deus djônes étrindjirs è vwètture, li sonk a valser divins li corotte et il a st'avou li sogne di s'veye.
- Luc : Dji deû v'dire la dissus, qui dj'a stu à l'opitâl è n'observâcion a câse dè grâs pourcé qui dj'aveu apici so l'front
- Bertrand : Bref, divins l'arèdje, il a stu s'crire so « Visèdjebook » çou qui pinsève des étrindjirs .....on po come vos qwand vos estez so des tchôdes cintes, èvoyi fé arrèdji li Directeûr
- Luc : Volà poqwè dji so condâné mins, on n'ricwire nin les cis qui m'ont èvoyi divins li corotte et asteur, c'est chal qu'on voû m'mette so l'paveye. Po l'moumint, dji so divins les avocats qu'a, on n'a stu dire qui dji n'inmève nin les étrindjirs adon qui dji so marié avou ine flaminde
- Jwana : Dji'v comprind asteur et poqwè estez v'nou chal ?
- Luc : Dji n'a m'so di tote cist istwère, dji so v'nou donner mi démisson.
- Jwana : C'est li pire des bièstreyes qui vos alez fé, ça vou dire qui vos admetez vos twerts. On vint dire qui nosse payis est libe et démocratique et qwand nos dihans ine saqwè, volà çou qui arriv.....c'est disgostant. Ni fêt nin çoulà !
- Bertrand : Tèyez'v o adon, nos alans nos assètchi des méhins.
- Jwana : Clore si betch, po nin dire ot'tchwè et si lèyi fé, si n'est nin divins mi timpéranmint
- Luc : Et portant mam'zelle, nos d'vans bin viker come çoulà di nos djous
- Bertrand : Dj'a bin d'vou akceper li novèle émission avou vos. Veyez'v qui fât composer avou tot l'monde
- Jwana : Come mi avou vos, vos m'avez bin dit di n'rin dire et fé on bê sorire.....on sorire di bièsse. Veyez'v, c'est câse di djin come vos qu'on n'sé nin avanci divins l'veye. Vos estez todi a rabahi les djins qui sont suremint pus capâbe qui vos mins, vos avez sogne adon, vos dihez dè clore nosse betche
- Luc : Dji creû qui por mi, li fin est proche et qui bin vite, dji va d'veur ramasser mes ahèsses et cwiter mi burô. Vive li liberté.....mins nin li liberté d'espression
- Jwana : Rapâftez'v, ine djin come vos ni deus nin bahi les brèsses, dji'v là co dit tot-rade
- Bertrand : Tot façon, vos n'aviz qu'a tourner sèt' cops vosse linwe divins vosse boke
- Jwana : Dji voreû qui çoulà vos arriv' po veur vosse tièsse et surtôt , çou qui vos direz. Pinsez'v qui vos estez ot'mint qui n'ote ?
- Bertrand : Dj'a del manire mi.... po djâser âs djins

- Jwana : L'cis qui vos avez po l'moumint ni mi plet nin
- Bertrand : Si n'est nin pace qui i n'a ine saquî chal qui vos d'vez fé di vosse narène, nos verrans bin kimint vos djâz'rez qwand li producteûr sèrè chal
- Luc : Arestez di vos atèler et arrindjez'v, li veye est bin trop coute po s'kihagni come çoulà

### Sinne III

Roland – Jwana – Bertrand

- Roland : *(intrant divins s'buro)* Qui fez'v chal tot les treus ? Avez'v co dandji di çances ?
- Bertrand : *( setchemint )* Nèni, volà li cisse qui va prezinter l'émission avou mi
- Jwana : Dihez don vos, dj'a on p'tit nom. Vos m'prinez po vosse tchin ?
- Roland : Ah awè, vos estez li.....
- Jwana : *(tot l'copant )* grimeuse, bondjou moncheû
- Roland : Dji n'âreu mây tuzer à vos mins, a vosse loukeur vos estez égardji so l'cop. Avou on visèdje pareye, on cwer pareye et ....
- Bertrand : ine clapette pareye.....
- Jwana : Di s'costé là, ele vât bin l'vosse
- Roland : Tint mî vâ si li clapette va bin, vos avez tot po fé di vos ine vidette del télévision.
- Jwana : Avez'v étindou.....ine vidette di télévision.....vos avez del concurrence camaråde
- Roland : Prinez bin asteume a leye, seyez amistâve et nin d'biestreyes o adon....
- Bertrand : Dji prezinte des émissions mi..... dji n'ouveure nin divins li sociâl
- Roland : Continuwer come çoulà et vos irez bin vite fé dè sociâl ôte pârît qui chal....m'avez bin sèpous
- Bertrand : Bon, bon, nin mèzâhe di v'mâvler po si pô.
- Roland : *(tot s'ritournant so Luc )* Et vos, vinez'v m'djâser del plève ?
- Luc : Nona, Dji so v'nou vos d'mander di'm ramplacer po kèkès timp...minme po tot l'timp
- Roland : Si n'est co fini vos méhins, vos n'savez nin tini vosse linwe. Cist cop chal, dji'n sé rin fé por vos, li directeûr est divins ine colère dè tot les djâles, i vou v'taper à l'oûh po fotes grâves

- Jwana : Permettez'm di'v dire qui, çou qui l'a fet, minme bièssemint, tot l'monde l'âreû fet so on cop di tièsse. Di tote façon, les cis qu'on spi'yî si vwèture, les a-t on ritrover ? Néni ! C'est qwand minme mâlureus di condâner on ènnocint. Bin vite, nos n'arans pus rin à dire et nos divinrans des étrindjirs divins nosse prope payis
- Bertrand : Vos veyez, qwand dji'v di qu'elle a ine fameuse clapette, dji n'fê nin les peûs pus gros qu'i n'sont
- Roland : Nos estans mâ mettou po djudji li situâcion. Dimaner è vosse mohone, dji diré qui vos estez malâde, dji dimindré à ine saqui dè prindre vosse plèce po li météo. Rispwèzez'v on po.
- Luc : Dji'n sâreu , dj'a tèlemint d'istwère divins l'tièsse qui dji n'dwème pus.
- Jwana : Houter moncheû météo, aler r'trover vosse feume et sahi on po dè prindre dè bon timp, po onk qui donne li météo, vos d'vez kinohe les p'tits cwènes o i-n-a dè solo
- Luc : Dji n'a nin l'timp po çoulà, po l'moumint dji deû êdi li pilote di novê avion solère po l' vol d'inôgurâcion. Dji deû annoncer li direction dè vint, li timp qui va fé li djou dè lancemint et tot l'restant
- Bertrand : Luc, dji sé qui vos prinez vosse mesti a cour mins po l'moumint, suvez nos conseys. Si vos n'el fé nin, vos sèrez capâbe dè fé des biestreyes et di nin diner les bones prévîzions météo. Tote façon, çoulà n'ârè lieu qui divins deus meus, adon, vos avez tot vosse timp
- Luc : Vos savez, li météo si n'est nin come prézinter ine émission, nos divans aponti çoulà bin lontimp d'avance
- Roland : Houtez, si vos discutez co, vos irez v'arrindji avou li grand patron. Rispwèzez'v po moumint, vaner bin vite è vosse mohone.
- Luc : Awè li grand patron, i 'm rattind dispoye lontimp. Là avâ, i deût bin rire di mi
- Roland : Kimint là avâ, li patron est chal , divins si buro.....assurez, dji l'a étindou grogni
- Luc : Néni, nin cis là, l'ôte grand patron, li cis qui est âs cirs
- Roland : Ah néni, ni vinez nin fé des biestreyes, li veye est bin trop coute adon, fé'm li plêzir di djâser d'ot'tchwè
- Bertrand : Luc, vos avez ine feume qui v'z'inme adon, tuzer a leye et nin âs ènnocints qui tounent âtout di vos
- Roland : (Vecsé ) Si i n'a des ènnocints, vos estez divins li lot
- Bertrand : Si n'est nin çou qui dj'a volou dire mins, i n'a tèlemint des mâles djins qui dihet dè mâ so les ôtes . Luc, alez è pâye tot fini'rè par s'arrindji

Luc : Qui l' Bon Dju vos étinde (*sort dè burô et creûh Pénélope*) Àrveye

#### Sinne IV

Pénélope – Bertrand – Jwana – Roland – Hinri

Roland : Di wice vinez'v ?

Pénélope : Moncheû a suremint rouvi qui dj'esteû étrin di tèni à l'ouy li fré da moncheû et i m'sonle qui l'fré da moncheû n'est nin so l'bonne voye. Dispoye qu'il est chal, tot l'monde a pierdou li sorire, on s'pins'reû divins ine morgue

Roland : Ni vinez nin dire dè mâ so m'fré et suvez ses conseys, tot l'monde d'vreur s'ur ses conseys

Bertrand : Houter, si n'est nin pace qui c'est vosse fré qui fât li diner rêzon por tot

Jwana : Leyans l'fé, il a mutwè des bones ideyes

Bertrand : Dj'a on po sogne, si moncheû météo vinreut li creûh'ler, lu qui a dèdjà des neures ideyes, si i l'houte, i sèrèû capâbe di s'touwer. Pénélope, prinez asteume qui moncheû météo ni vint li rescontré , li vint poreut mâ tourner et on âreu ine catastrophe divins l'mohone

Hinri : (*intrans divins li buro di s'fré*) Fré, dji creû qui vosse émission n'irè may. Dji m'a rac'sègni adlé li curé di nosse vièdje et i n'a qu'ine cope qui va fé li grand nouk, i fâreû candji vosse fusik di spale

Bertrand : C'est dèdjà çoulà, vat mî onk qui nouk, nos frans todi bin avou çoulà. I fâreû candji on po li prézintâcion di l'émission et.....

Hinri : Dji'v arête tot dreut. Dj'a rouvi dè dire qui l'ome aveut 80 ans et li feume 77 adon, i n'sont pus tot djône et d'pus, c'est li treuzinme cop qui l'ome si mareye

Pénélope : Oufy, qué corèdjeu

Roland : Dihez'vos, alez on po continuwer vosse awède, dji'n vos pâye nin a rin fé.

Pénélope : Mins mocheû, çou qui dji deû awèti, dji l'awède dèdjà adon, poqwè awèti pus lon adon qu'on pou mî awèti chal. Si çoulà vos continte, dji vou bin fé çoulà tote mi veye, ça n'âhie nin (sort)

Hinri : Qui deu-t-ele awèti ?

Roland : Rin o pus vite, les djins qui aminet les novèles ahèsses po l'émission

Hinri : Vos n'avez nin on rèdjiheû po çoulà ?

- Roland : Il est malåde adon, c'est leye qui l'ramplace mins, dji'n sé nin si nos arans dandji dè totes ses ahèsses si l'émission va dédjà a cou come vos dite. Qu'alans-gne fé, dji n'sé pus mi
- Hinri : Dj'a ine ideye mins dji'n sé nin si vos l'aler l'akcepter
- Roland : Dihez, nos vos houtans
- Hinri : On poreus réyiâlisier li dièrinne volti d'ine djin qui va morri. Po kimincé, fé kinohance avou li famille, dimander kimint il esteû et si rac'sègni adlé li morrant po kinohe si dièrin d'zir....
- Jwana : Bonne tuzeur çoulà et si il est divins li coma, kimint alez'v fé ?
- Hinri : Awè, çoulà dji'n l'aveu nin tuzé
- Roland : Nos estans divins li sipéheur, qu'alans-gne fé ?
- Jwana : Dj'a ine p'tite ideye. Ni porez'v nin arrindji ine fâsse émission, come direut-on, hiner ine amwèce à péhon. Dji m'èsplique ! On poreut filmer on fât ètèremint di veye di djône ome et di mam'zelle mins, avou ine saqwè qui assètche ossi bin les omes qui les feumes, avou on po di calinereyes divins tot les cwènes, veyez'v çou qui dji vou dire et après, vos linsrez l'ideye di vosse émission avou des réclames qui vos passerez totes les dîh minutes, ine saqwè qui les djins ni poreût nin si sètchi foûh del tièsse, ine saqwè qui inteure divins l'tièsse po n'pus mây ènnè sorti
- Roland : Dji l'aveu tuzé mins vos avez stu pus vite qui mi po l'dire. Po fé çoulà, i'm fâreû ine saqui d'étrindjir al mohone po djower li rôle dè cis qui fièsse si ètèremint di djône ome
- Jwana : Po çoulà, dj'a mi p'tite ideye
- Bertrand : Dji m'attind à pé
- Jwana : Po li rôle, dji kinohe bin ine saqui qui poreût fé l'afêre mins, il ouveure qui d'zos contrat
- Roland : I l'ârè çou qui vous si i sâve l'émission et po li rèsse
- Jwana : Po li rèsse, lèyez'm fé. Awè i fâre ossi des personèdjès po djower li rôle des camarâdes
- Bertrand : Ça m'plèreut bin di djower là divins
- Roland : Vos, vos estez trop kinohou, vos frez vite capoté l'ideye mins, si on prindreû Hinri, i poreû fé l'afêre



- Bertrand : Lu, avou si tièsse di mwert....lèyez'm rire. Les djins vont pinser assister tot les djous a on ètèremint po di bon. Escusez'm Hinri po m'frankisté mins, i fât bin l'avouwer qui si n'est nin vosse plèce
- Hinri : Vos djudji les djins so leu façon di s'moussi o so leu tièsse. Dji poreû vos mostrez li contrâve so deus minutes
- Bertrand : Dji'm diminde kimint.... Tot vos broulant po v'fé rire o vos fez des caratchons d'zos les pîs. Roland, dji respecte vosse fré mins là, i tchouke on po, ni pinsez'v nin .
- Roland : Prinez asteume a lu qu'a, des feyes il èware les djins mâgré si mesti. Ine ome qui n'reye mây n'est nin fwercémint ine ome sèrieus
- Hinri : Avez'v chal on local o on mette totes les mousseures ?
- Jwana : Awè, tot sortant dit-chal, alez è fond dè colidôr, c'est li treuzinme pwète so vosse inche. Si c'est serrer, dimander li clé à Mathilde, elle ouveure djusse a costé.
- Hinri : Rawardez on moumint, dji'm va v'mostrer qui dji pou fé ot'tchwè qui d'étèrer les djins o di tchanter li mèsse (*sort dè buro*)
- Bertrand : Aresté on po li comédeye, vos n'alez qwand minme nin li lèyi djower, ça va mette tote nosse ovrèdje a cou
- Roland : Poqwè ni volez'v nin qui djowe, câse qui s'est m'fré ? Si vos estez disconte lu, vos estez disconte mi
- Jwana : Lèyi'l si tchance, i n'fât nin djudji les djins sins saveur
- Roland : Dji'm sovins, qwand nos estiz èfants, tot l'monde si mokève di lu câse qui n'riyève nin et i n'esteû mây invité às fièsses. On djou, on a vèyou arivé a l'anniversère di m' camaråde di sicole Dudule, on gugusse. Personne ni savève qui i l'esteû, on s'a rac'sègni dilé les parints da Dudule minme zels pinsève qui s'esteut nos qui l'aveut inviter po fé ine surprise. Nos l'avans lèyi fé si riprèzintâcion tot l'monde riyève às lâmes tèlemint qui l'esteû drôle. Qwand il a avou fini, il a bodji si rodje narène et ses fâts tchivès et là, dj'a veyou mi fré. Nos estis turtos èwarés.
- Jwana : Poqwè n'a-ti nin pris on mestis o il âreû pou fé rire les djins al plèce del z'est fé tchouler, sareû-stu brâmint mî
- Roland : Tot a candji li djou o nosse tchet est mwert. M'fré inme bêcop les bièsses. « Toursiveu », nosse tchet aveu si narène tot costé, i falève r'louki a deus feyes qwand on fève ine saqwè. On djou nosse mame a mettou si boheye divins li machine et dji'n vi raconte nin li restant. So on tourne disque, sâreû-stu mons vite. Qwand li machine a-stu termineye, mi mame pinsève qu'elle aveû rouvi si « boubou » divins, i ravizève a ine grosse bâle di mousse câse dè prôdwit qu'èle

mètève po bouwer mins volà, « Toursiveû » esteût div'nou tot reud minme sins amidon

Jwana : Pove tchet, il a stu tot ritourné

Roland : Volà li câse qui m'fré est divnou come çoulà mins, qwand on l'mette foûh d'lu, i candje come docteur Jeckyll et Mister Hyde mins d'ine ôte manire (*on étind brère des djins*)

Pénélope : (*Inteure foûh d'leye*) Moncheû, moncheû, i n'a on drôle qui fet l'énocint divins l'mohone, dj'a d'vou dimander a l'ajant di sécurité del mette à l'oûh

Roland : Ine saqui qui fé rire divins l'botique, aler bin vite l'cwèri. I n'a qu'on énnocint po fé çoulà....mi fré

Bertrand : Vos ni tusez nin, vosse fré, fé rire les djins.....vos estez acsus

Jwana : Dji'm rafeye del veur

### Sinne V

Les minme pus Pénélope et l'ajant di sécurité

*L'ajant di sécurité inteure tinant Hinri po l'pê des rins*

Pénélope : Aminez'l chal Tchétché, n'el lachez nin

Tchéché : Dimanez pâhule mam'zelle Pénélope, dj'el tins bin, i n'sâreû vaner

Hinri : (*moussi avou ine tchimise di totes les couleurs, des fâts tchivès*) Lachez'm énnocint, dji so l'fré dè producteûr, vos m'fé dè mâ.....grosse mosse qui vos estez

Tchéché : Et mi, dji so li rwè di Prusse. Tinez'v keu o adon, dji'v mette ine pètêye

Roland : Vos polez l' lèyi, c'est bin m'fré

Tchéché : Vosse fré moncheû, mins vosse fré est vinou avou on côrbiyârd qu'est gâré po-dri li studio 4.

Hinri : Vos veyez bin qui sins mi costume di croque-mwert on n'mi riknohe nin, dji'v l'aveû dis mins, on vou mây m'creure

Jwana : Profécia, vos nos avez lèyi turtos so l'cou, dji n'âreu may pinser çoulà di vos. Vos estez pus fwert po fé rire les djins qui po les fé tchouler. Vos d'vris èsse animateûr.....

Bertrand : Eh là, i n'a qu'on animateûr chal.....mi

Jwana : Vos, vos ovrer qui po les vîs.....des djins di vosse adje mins vos rouvriez li novêe générâcion.

- Bertrand : *(vecsé)* Merci po l'complimint, vos dji'v rattind
- Jwana : Dji so là, qui m'volez'v ?
- Roland : Pénélope, kimint kinohez'v li p'tit nom di l'ajant di sécurité ? Vos estez bin fwert di kinohance
- Pénélope : Tot l'monde chal kinohe si p'tit nom, c'est marqué so s'plaque di signalemint et pwis, dji'n pou nin l'dire mins, dji'v zel di qwand minme, c'est m'galand.
- Roland : Hein....cwè....kimint çoulà vosse galand ?
- Tchètchè : *(éwaré)* Qui...mi.....vosse.....dj'a co potchi on épisode
- Pénélope : *(tot fant ine clignette)* Bin awè, grand sot, ni vinez nin m'dire qui vos avez dèdjà candji di crapote
- Tchètchè : Fâreû dèdjà trover eune qui prind asteume à mi. Estez'v bin divins vosse tièsse ?
- Pénélope : *(tot stroukant li djambe di Tchètchè)* Ni vinez nin fé l'ènnocint pace qui i n'a des djins âtout d'nos....hein nounours
- Tchètchè : *(a pârt)* I fâreû po kiminci, mi rac'sègni divins quèl istwère dji djowe. Qui m'volez'v ?
- Roland : *(a pârt)* Dji kimince à comprindre si djeu. Dihez camarâde, ine p'tite kestion qui vins a m'tièsse, avez'v dèdjà fê del télévision ?
- Jwana : Pinsez'v à çou qui pinse ? Ça poreut roter, qu'ènnè pinsez'v ?
- Pénélope : I poreû vini avou nos ôtes po li tournètje. Ça vos n'direû nin d'èsse avou nos ôtes ?
- Tchètchè : Houter, dji'n so mutwè nin suti mins, dji n'inme nin qu'on s'moke di mi. Dji so chal po fé respecter li lwè et assurer li pâhulisté des djins.
- Jwana : On bel ome come vos, divins ine novêl émission, tuzez-y, bêcop di djônes on kimincer come çoulà divans di div'ni vidette. Vos avez on cwer, des ouys.....
- Tchètchè : Et tot l'resse *(kimince a tchanter alouette, gentille alouette)*.....Vos estez bin binameye mins, dji'n voû nin piète mi posse d'ajant
- Jwana : On n'vos a nin dit dè cwiter vosse posse, nos volans tot simplumint qui vos viniez avou nos po djower divins li bande annonce del novêl émission. R'louki on po, vos estez li pus bê d'inte nos et i fât assètchi les djônes omes....
- Tchètchè : Oh là, dji'n so nin di s'bwerd là savez
- Jwana : Lèyez'm fini m'frâse, dji d'hève qui nos divans assètchi les futurs mariés et dji pinse qui di s'costé là, nos arans totes nos tchances grâce à vos. Ni dihez nin néni, louki âtout d'vos, nos avans dandji d'vos èdon vos

- Turtos : Oh awè !
- Tchètchè : Dji veû dit-chal « L'incroyable galand « Ça va-t-i duré lontint ? Dji n'a nin qui çoulà a fé et d'pus, dji deû rinde des comptes à mi patron. Vos savez, i n'a des djous o dji mi r'trouve à Brussel et deus eures après à Vervis, dji n'a nin ine veye di tot r'pos.
- Roland : Et ine saminne di ripos avou nos et d'pus.
- Tchètchè : Et vos payi bin po cist istwère là ?
- Roland : Nos verrans çoulà pus târd, nos d'vans po kiminci sâver li programme
- Bertrand : Oh là, et mi, kibin va-dje gangnî divins cist istwère, dji so qwand minme li prézintateûr vidette et ine vidette deus gangnî pus qui les ôtes
- Jwana : Cloez on po vosse badjave, ça n'vos frè nin twert
- Pénélope : Dihez, mi ossi dj'inm'reû bin participer minme po rin.
- Bertrand : Leye, vos polez'l prindre so l'cop.....si c'est po rin
- Roland : D'acwerd, dji'v ègadje so l'cop et ni rouvians nin mi « zozo » di fré.
- Hinri : Dji pinsève qui vos m'aviz rouvi, sins mins neure mousemints, on n'mi rik'nohe nin, èdon moncheû l'ajant di sécurité. Dji'v z'a bin djondou.
- Tchètchè : I n'fât nin djower avou l'feu, dj'âreû pou vos fez ine grosse narène o minme setchi sor vos. Grâce à yoga, dj'a pou warder mi pâhulisté.
- Hinri : Dihez pus vite, qu'avou vosse vinte, vos n'savez nin corri fwert reud
- Tchètchè : Prinez asteume às omes bin pwertant, on gros vinte ni vou rin dire. Li prouve, dji'v a qwand minme apici
- Jwana : Veyez'v qui tot s'arrindje et asteur à l'ovrèdje. Pus vite nos arans nosse tècse et pus vite tot çoulà sèrè mettou è bwète
- Roland : A l'ovrèdje asteur. Suvez'm, nos alans trover li réyâlisateûr lu, vos dirè çou qui n'a a fé *(tot l'monde su Roland sâf Pénélope)*
- Pénélope : *(à téléphone )* Allo.....awè Dji so divins.....i vont fé ine émission so les ètèremints.....néni, nin des ètèremints come çoulà, des ètèremints di veye.....mins néni, i vont nin fé morri des djins, i vont filmer des ètèremints di veye di djônes omes o djones feumes *( a s'moumint là, Roland arriv et si catche po houter li conversâcion )* Dji'n creû nin qui ça va rotter, il a ègadji des arlakes.....nin minme des comédyins tot çoulà po fé à mons tchir.....li prouve, dji djowe divins, n'a nin di qwè rire *( Roland fet dè brut )* Bon, dji'v là, vos chal ine saqui
- Roland : Pénélope, qui fez'v là ? Dj'a diminder di'm sure

- Pénélope : Dj'aveu rouvi dè prev'ni li chervice tirèdje po li réclame del novêe émission. Dj'a tèlemint d'ovrèdje qui po fini, i fâreû égadji ine deuzinme sècrète. Dji deû tini a l'ouy li fré da moncheû, fé li corri et asteur.....
- Roland : Stop ! C'est vos qui avez dimindé po participer à nosse émission asteur, si çoulà ni vos va nin, vos polez todi dimaner chal et vos occuper dè corri et dè téléphone
- Pénélope : Si n'est nin çou qui dj'a volou dire moncheû, dji'm rafeye dè participer, minme on p'tit po a vosse émission et surtot veur kimint çoulà si passe
- Roland : Et raconter a tot l'monde çou qui nos alans fé ?
- Pénélope : Poqwè dihez'v çoulà ? Dji sé qui chal, tot deut dimaner scret : « Tot veur, tot étinde, rin motti » Dji'n so nin ine badjawe di trotwér, po qui mi prinez'v ?
- Roland : Vinez avou mi, nos irans veur li plan po nosse émissison et mette les istwères a pont avou li réyiâlisateûr
- Pénélope : Bin moncheû, dji'v su
- Roland : Tot y tuzant bin, vos kinohez li mohone adon, aler ritrover les ôtes, dj'a co kèkès istwères a arrindji chal , dj'irè vos rijonde on po pus târd
- Pénélope : Bin moncheû (*sort dè buro* )
- Roland : (*A téléphone* ) Allo li central, chal moncheû Delmousse dinez'm li numéro dè dièrin cop di téléphone qu'on vint di passer di'm buro.....awè dji rattind. Allo, awè a bon.....merci. Li chervice dè tirèdje.....dji veû

## Sinne VI

### *Tîbât -Roland*

- Tîbât* : (*intran à cop d'vint* ) Vos v'moker di mi ? Vos m'évoyi des énnocints quatwaze qui vinet m'dire qui vont tourné po li novêe émission et qui c'est vos qui les avé évoyi. I fâreû m'prev'ni
- Roland : Rapâftez'v, dji'm va vos espliquez. Vos savez bin qu'asteur, nos estans divins ine période o nos divans fé des spâgnes adon, dj'a égadji, po rin l'ajant di sécurité mins, i n'en sé nin co, mi sècrète et mi fré po tourner divins li réclame po lancî nosse émission mins, dji deû vos prévni, i fât djower serrer qu'a, i n'a on « foyant » qui va raconter tot costé nos projets po nosse novêe grille d'émissions, nos divans li stopper.
- Tîbât* : Vos n'alez qwand minme nin mette l'émission des étèremints divant les mariètjes ?
- Roland : Poqwè nin et après les marièdjés, nos frans les divorces et dji pinse qui nos arans co pus di djins po l'houte so nosse tchinne

- Tîbât : Si vos fé çoulà, nos arans li avocats, les d'vorcés et tos l'restant après nosse tièsse et li mohone va d'veur payi, si n'est nin come çoulà qu'on va spâgni
- Roland : C'est çoulà l'ideye, pus i n'a dè scandale, pus li houte sè'rè bonne et ça va fé vinde des magazines « people » et les çanses rivinrans divins nos kèsses
- Tîbât : Si nos d'vans payi les avocats, li kèsse sèrè vite vude et li prézidint sèrè di mâle oumeur et mi, dji prindré èco après m'tièsse. Vos n'avez nin des ideyes pus sutie ? Ça ode nin bon tot çoulà. On âreû d'voû riprindre les bonnes vîles émissions come d'avance al plèce di s'lanci divins dè telles émantcheures. Nos ridjâz'rans dit çoulà ine ôte djou, po l'moumint c'est les étèremints, wardans cist ideye là
- Roland : Nos alans révolutionner li monde del tv et tot çoulà grâce a qui.....
- Tîbât : à des ènnocints qui dihet n'importe qwè. I fâreû terminer les inregistremints li pus vite possib, ni rouvriez nin qui ça deut tourner po septimbe o ocktobe.
- Roland : Dé calme, camarâde, dji so certins qu'avou vos, tot sèrè fini divins les timps
- Tîbât : Come ça rote po l'moumint, nos ârans suremint fini divans li Noyé
- Roland : Novimbe, halloween, li tossint, volà li bon moumint po évoyi nosse émission. Asteur, espérans qui nos ârans bêcop participants à nosse concours
- Tîbât : Si vos n'volez nin étèrer vosse émission divant qu'ele n'âye vèyou li djou.

## Sinne VII

Roland – Tîbât – Hinri – Pénélope – Bertrand – Jwana – Tchètchè

### *Intret turtos moussi â pus comique*

- Jwana : Nos volà, qui pinsez'v di nos mousseures ?
- Tîbât : Mon Dju, dj'a dèdjà vèyou des ènnocints mins des pareyes, a tchouler di rire.....A v'veur, on s'pins'reu a on karnavâl et nin a on étèremint.....
- Roland : *( tot l'copant )* C'est çou qui fât, vos estez a pus les pus bês et vos, l'ajant di sécurité, vos estez d'on chic
- Tchètchè : Si on mi veyève agadlé come çoulà, on m' mètreu tot dreut è fond dè djârdin po fé sogne âs ouhès. Sohètans qui mes camarâdes d'ovrèdje ni mi ric'nohe nin.....li honte por mi
- Jwana : Vos savez, dji volève v'moussi a feume, vos ârez stu co pus bê
- Tchètchè : S'ennè assez, dji'm risètche, dji'n so nin chal po qu'on reye di mi, avez'v bin compris.
- Jwana : Arestez on po ! Si vos estez todi so li houpdigué on n'deut nin rire sovint avou vos.

- Tîbât : *(A Roland)* Dji'n sé nin çou qui çoulà va diner mins, dji'v assure, si vos toumez li betch divins lancène, vos i diman'rez...
- Roland : Leyez'm fé et nos arrans li sucès di l'âneye.
- Tîbât : On sucès avou des étèremint, dj'âre tot étindou d'vins m'veye *(sort de buro)*
- Roland : Bon ! Les éfants assez discuter, i fâreut riveur vos mousemints, ça n'va nin. Vos risonler pus a des marticots qu'a des djones prêtent a fé li grande ascohêye.
- Hinri : Vos n'volez nin qu'on rimette nos pantalons « pattes d'ef » et nos tchimises a col « Mao » Nos estans è 21 sièke, tot a candji.
- Roland : Houter fré, si n'est nin çou qui dji vou dire mins, moussîz'v on pus sérieusemint. Nos n'estans nin divins ine émission da Patrick Sébastien
- Hinri : Des bèrikes, des tchivés bin plaki et ine tchimise tote prope come onk qui vint de fé ses Pâkes. Arestez on po, sèhans djône et sot
- Tchètchè : Djône... dji'n pinse nin mins, sot, i n'a pus qu'on n'el pinse chal. Dire qui dj'a akcepter li mesti d'ajant di sécurité po payi mi louwi et dji'm ritrouve câsi ine sitcom, manke pus qui les feyes d'a costé.
- Roland : Arestez de grogni so tos, vos d'vriz èsse contint de fé del télévision
- Bertrand : On bê grand valet come vos, vos ârez de sucès adlé les djônes feumes. Vos n'el pinsez nin ?
- Tchètchè : Tot y tuzant bin, di pus, les feumes inmet les uniformes et di s'costé là, dj'a so qui fât
- Jwana : Bon, alans nos candji et nos frans çou qui vos volez. Suvez'm
- Pénélope : Moncheû, so-dj co oblidji del z'est sur, dj'a brâmint d'ovrèdje et....
- Roland : Vos n'alez nin dimaner come çoulà, vos ravisez a Brigitte Bardo mins nin li cisse di si djône timp. Alez'v candji à pus vite
- Pénélope : Si dji comprind bin, vos dihez qui dji ravise a ine vîle bique, fâreû vos r'louki on po
- Roland : *(tot l'copant)* Vos n'alez nin discutez avou mi, vaner foûh dit-chal po mi riv'ni *(Pénélope sort tot grognant)* Po qui si print-ele ? Li mèsse chal, c'est mi et nol ôte
- Hinri : *(riv'nant so ses pas)* Fré, poreu-dje v'djâsez ?
- Roland : Qui n'a-t-i Hinri ? vos n'estez nin co d'acwerd avou mi ?
- Hinri : Dji'n discute nin mins, si vosse ideye ni rote nin, qui va-t-i s'passé ? N'alez'v nin piète vosse plèce.

- Roland : Néni Hinri, si çoulà ni rote nin, nos rimetrans è plèce les vîs émissions li l'timp dè ritrover ine ôte ideye
- Hinri : Damadje ! Dj'âreu pinser qui vos âriz vinou ovrer avou mi. Dispoye les âneyes qui vos avez cwiter li mohone, vos nos mankez savez. I n'a des djous o dj'a sogne por vos. Aueur çou qui s'passe, dj'a sogne tos les djous por vos, on accidint, ine mâle malådeye...qui sè-dje. Dji n'a qui vos come fré
- Roland : C'est djinti dè tuzer a mi mins, tuzer a vos . Vos veûrez d'ici po d'timp, vos afêres vont riprindre.
- Hinri : Sohètans qui l'a, al copète, i v'étinde qu'a chal, po l'moumint c'est l'infer
- Roland : Vos savez qui vos estez on po come nosse mame ; vos pinsez todi qui dji n'so bon a rin mins, vos veûrez qui dji va réussi
- Hinri : Dji'm va priyî por vos ( *prind ine tchèyire et si mette a djino* )
- Roland : Alez fé vos ôrémus ot'pârt qui chal, si ine saqui vint, qui va-t-i pinser ? Co bin qui n'a nin di carpète, i sèreût capâble di s'mette a cwate pattes. Nos n'estans nin divins ine église ( *a s'moumint là arrive Bertrand* )
- Bertrand : Dihez....Oh escusez'm, vos avez ine saqui di mwert ?
- Roland : Néni, mi fré fè ine priyîre po qui tot âye bin.
- Hinri : ( *kimince a fé des drôles di bruts* )
- Bertrand : On direut on vî pot d'échapemint, estez'v sur qui ça va bin è s'tièsse ?
- Roland : Li prumi co, çoulà paret bizâr mins après, c'est normâl
- Bertrand : C'est mutwè si tube catolique qui fet on brut come çoulà
- Roland : Catolique....oh awè, i n'a rin d'pus catolique qui lu. Tot les dimègnes, i va a mèsse, i partâge tot avou les ôtes et i magne minme dè pourcè.
- Bertrand : Qui prind todi asteume, louki on po , i n'a li tchèyire qu'est foû sqwer, i poreû toumer et si fé mâ
- Roland : Teyez'v asteur et leyi'l fé ses priyîres
- Hinri : Seigneur êdi mi fré et totes les bones âmes qui vont tourner divins li novêl émission, dji sé bin qui di vosse timp, on n'djâsève nin di çoulà, vos aviz les djeus dè cirque asteur, nos djeus si passèt divins ine p'tite bwète qu'on loume télévision. Dji'v houke insi qu'a tos vos tubes catolique. Merci à vos Seigneur di nos êdi.

**Turtos essonle :** AMEN



- Bertrand : Mins il aveû des bêles vwètures.....li bon Dju est qwand minme monter à cir è « Triomphe »
- Roland : Po dire des biestreyes come çoulà, cloez vosse betche et aponti vosse tecse po li prézintâcion
- Bertrand : Merde ! Dj'aveu rouvi l'anrèjistrèmint di l'émission « Arrête di tchanter » . Dji deû èsse so li platè divins dîh minutes et dji so chal a dire.....
- Roland : des biestreyes comme tofer. Vaner bin vite foû d'chal (*Bertrand sort de buro*)
- Hinri : Vos divez èsse mwert nierveu, çoulà ni vât rin po vosse cour. Sondji on po, i vinreû on mâ
- Roland : Vos ârez ine cante di pus a vosse tâble. Asteur, alez vos aponti qu'a nos n'avans nin l'timp a piète et, on n'sé may....ine saqwè poreut arrivè (*a s'moumint là, arriv Pénélope*)
- Pénélope : Moncheû, vinez à pus abeye so l'platè 5, i n'a on mèhins avou les nos figurants
- Roland : Tîbât ni sé nin s'enn'occuper, dji n'a nin qui çoulà a fé, tote façon c'est todi mi po fé tot chal
- Hinri : Aler fré, li divwèr vos houke, dji'm va avou vos (*sort tot les deus*)

### Sinne VIII

Pénélope – Tchètchè

*Pénélope les r'louke sorti et attind on p'tit moumint.*

- Pénélope : (à téléphone) Allo, c'est mi ! Dji n'a nin l'timp di'v raconter tot mins, i sont so li projet. Si ça va roter.....leyez'm rire avou les énnocints qui vint d'ègadji, i n'a nou dandji, i sont co pus bièsse qui leu pîs (*a s'moumint là Tchètchè arriv et houte çou qu'ele raconte*) Nin mèzâhe di brôdi leu émission, i vont li fé zels minme....kimint çoulà....certènemint qui dji so sur di mi.....mins néni, minme lu, i n'sé nin kimint i va attaker et d'pus, avou si dimeye cervé di fré, i mette co pus di bonne oumeur divins li barake....nona, c'est on croque-mwert, l'ambiance qui n'a chal. Dji'v tins a corant si dj'a co des novêles (*Tchètchè fet on po de brut*) Dji cope asteur, vochal ine saqui.
- Tchètchè : Qui fez'v là ?
- Pénélope : (*potchant so plèce*) Mi....rin o dihans pus vite, dji fê çou qui vos n'fé nin....dj'ouveure mi et pwis, dji so divins m'buro, poqwè mi dimandève çoulà ? Estez'v li patron o ajant di sécurité po l'moumint ?
- Tchètchè : Ajant di sécurité divant tot et figurant po l'moumint, pace qui divins l'veye, tot l'monde est figurant et tot l'monde a on rôle.....li veye est ine grande sinne di tàyâte et.....

- Pénélope : Bon, bon, dj'a sépou nin mèzâhe dè fé tote ine istwère. Si vos n'avez rin a m'dire, allez veur pus lon si n'a rin a fé.
- Tchètchè : Dji vòreû bin sèpi ine saqwè ?
- Pénélope : Dji'v houte
- Tchètchè : I n'a on p'tit timp qui divins li mohone, dj'étind des bruts d'espionnèdje. I n'âreû ine saki qui vind nos ideyes so les tchinnes adverses. Avez'v étindou ine saqwè a pwerpos di çoulà ?
- Pénélope : *( so ses gardes )* Dji'n prind nin asteume a tot çou qu'on raconte et pwis, les istwères d'espionnèdje, c'est bon po l'cinéma .....tote façon, ni prinez nin asteume à tot çou qu'on raconte
- Tchètchè : Dj'a des oreyes et des ouys, dj'ènnè poû rin.....dji so curieu
- Pénélope : Asteur, si vos n'avez pus rin a mi d'mander, allez trover li mousseuse po v'trover ine saqwè di convinâbe po djower divins l'émission. Ni pierdez nin vosse timp
- Tchètchè : *(dotant )* Bin ! *(tot bas )* Vos bâcèle, dji'v tin à l'ouy (sort)
- Pénélope : Pénélope, prind asteume a lu et âs ôtes, i d'vè si doter d'ine saqwè

### Sinne IX

Roland – Pénélope – Jwana

- Roland : *(tot intrant )* Ah vos estez là ! Dihez, avez'v aponti les contrats po nos acteûrs ?
- Pénélope : Nin mèzâhe ! Tote façon, si n'est qui des djins nin des videttes
- Roland : Dihez, qui'v print-i di'm responde come çoulà ? Nos d'vans diminder leu consintemint po difuser leu visèdje, avez'v rouvi vosse mesti
- Pénélope : *(si r'prenant )* Qu'avez'v dit ? Dj'aveû li tièsse avâ les qwârt.
- Roland : Al plèce dè sondji, vos frez mî di rentrer divins vosse buro et d'aponti les contrats, dispetchez'v al plèce de dwermi so plèce
- Pénélope : Bin mocheû, tot dreut.....dji mi va *(inteure divins s'buro )*
- Roland : Qu'a-t-ele co ? Elle est bizâr c'est moumint chal.....pormis, elle est suremint divins ses mâvas djous *(on boûhe a l'ôh )* Intrer !
- Jwana : N'a nol di dérindjemint ?
- Roland : Néni, intrer mam'zelle, intrer. Ine saqwè ni va nin ? Vos estez bin mousseye come çoulà, si i n'tinreû qu'a mi, dji'v metteû divins ine émission on po pus convinâbe qui divins li biestreye qui nos alans tourner

- Jwana : Poqwè dihez'v çoulà ? Vosse ideye n'est nin si mâle qui çoulà et qwand vosse fré si mette, on pout dire qu'on reye avou lu. Po onk qui mette ètère les djins, c'est nos ôtes qui va moussi divins avou totes ses fâtves qui nos raconte, c'est on pleyant
- Roland : Dji'v creû, malgré si mesti i sé co rire et fé rire les ôtes. Veyez'v, li veye si n'est nin qui des lâmes o del tristèsse mins ossi del djoye
- Jwana : Houtez, dji'n va v'raconter ine bonne blague : « In ome djâse avou on croque mwert. Li croque mwert li dimande si s'bêlemère aveu sohèter ine saqwè divant dé morri. L'ôte respond néni. Ele n'vos z 'a mây dit si ele volève èsse brouler o éterrer. Néni respond li bê fis. Si vos prinez li second, on pou co l'ébômer. Néni, respond li bê fis, broulez'l, dji'n voû nin li lèyi ine tchance di riv'ni » Si n'est nin amuzant cist istwère.
- Roland : *(sérieus)* Dji'n trouve nin
- Jwana : Et bin mi, awè.....c'est bin damadje qui ça n'arriv nin a m'bêlemère
- Roland : Qui vos estez métchante, elle est suremint bin binameye avou vos. C'est vos qui n'el comprinez nin
- Jwana : On veû bin qui n'vos vikez nin avou. Dji'm va vos raconter ine ôte : « On bus avou des minisses si sprâtche so ine âbe divins l'prè d'on vî sinci. Li sinci va veur et fet on tro po les éterer. Kèkès djous après, l'ajant veut l'bus et d'mande à cinsi o sont tos les djins. I respond : « Dj'a fé on tro po les ètèrer. Esteut-i turtos mwert ?, dimande l'ajant. Li cinsi respond : « i n'a qui dihève qui vikève co mins, vos savez bin, tos les politiks sont des minteus.
- Roland : Là, dji reye.....bon asteur tot l'monde à l'ovrèdje mins divant, a fwèce di raconter des blagues, n'avez nin seû ?
- Jwana : Si vos m'proposez on bon verre, dji'n direû nin néni. Qu'avez'v chal ?
- Roland : Chal, dji n'a pus grand tchwè mins, si vos volez, nos polans aler beure on bon verre ot'pârt
- Jwana : Dihez vos, vos m'fé des avances.....prinez asteume, dji'n so nin ine feume àheye
- Roland : Qu'alez'v pinser di mi. R'louki on po minme chal, les djins ont seû
- Jwana : Çou qui voû dire, qu'asteur c'est l'entracte
- Roland : Awè mins, nos n'mettrans nin des rèclames

**FIN AKTE II**

## AKTE III

*On meû vint di passer et nos djins tounent leu émission nin sins mâ*

## Sinne I

Roland-Tîbât

- Roland : Wice ènn'estez'v avou vosse émission d'ètèremint ? I n'fâreû pus trop târdji asteur
- Tîbât : Tot va po l'mî, nos avans avou kèkès méhins avou li décor mins, asteur tot va po l'mî et d'pus, nos comédysins sont à mî
- Roland : Estez'v certin di çou qui vos d'hez ? Si n'est nin çou qui dj'a étindou. I parè qui n'savèt nin djower li comédeye et qui s'est fwert deure po li répétiteu dè fé intrer li tècse è leu tièsse et d'pus, l'ambiance n'est nin fwert bonne.
- Tîbât : Totes mintes, totes biestreyes. Les cis qui v'z'a dit çoulà, ont bin minti. I n'a vormint des mâles linwes po mette li displi inte nos. Vosse fré a candji, il est di mèyeuse oumeur et les ôtes li suvèt ; on direut ine bande di djônes qui sortèt foûh del fore
- Roland : Qui ça n'seû nin trop li fore, i n'sont nin chal po djower mins po ovrer. A pwerpos les contrats, sont-i sinnés ?
- Tîbât : Awè et tot l'monde a-stu d'acwerd so tot
- Roland : Kimint çoulà d'acwerd so tot ? I sont minme d'acwerd dè tourné après djourneye et li semdi. Dj'inm'reû bin veur çoulà
- Tîbât : Attendez, dji'm va les cweri.... ( *fêt les cwanses di cwèri* ) dji'm va dimander a Pénélope, c'est suremint leye qui les a mettou kèkès pàrt ( *breyant* ) Pénélope, wice avez'v mettou les contrats po li novèle émission.....qui dji so bièsse, ele est avou les ôtes so li platè di l'émission.
- Roland : Qwand vos les ârez r'trover, vos vinrez les mostrez avou les signateûres et sins târdji. Dji'm va veur kimint l'inrejistremint si passe ( *sort* )
- Tîbât : I falève co qui mètte si narène divins mes afères, fé sinné ine saqwè di valeur a des djins qui n'ont nol valeur. Dji n'veû nin poqwè i d'veût aveur on contrat po fé ine ovrèdje qui tot l'monde poreu fé, tote façon, il a bin dit qu'ils ovrève po rin mins, dji'n saveu nin qui divève ovrer li semdi mins çoulà , i n'el savet nin. Ça va grouler, dji sin çoulà dit-chal. Dji deû fé tot mi minme chal. Bon li machine à s'crire wice èst-èle ? ( *tot rintrant divint li burô di Pénélope* ) Dju, qui fet neur chal, nin èwarant qu'ele si goure qwand ele tape li corri ( *sort avou li machine a sicrire dè burô* ) C'est bin mî chal ( *prind on papi et kimize a taper* ) ( NDL : Chal, po rindre li sinne pus comique, vos povez mette li musique Type Writer, immortaliser par li comique Jerry Lewis divins l' film « Un chef de rayon explosif ». Volà les papis tapés, dji'm va les dinner a Pénélope po ènn'fé des copies.....si dji deû n'el fé mi minme

## Sinne II

Tîbât – Pénélope

*Pénélope inteure divins l'buero*

Pénélope : Qui fez'v avou mi machine ? Vos ovrez o vos fez les cwanses ?

Tîbât : Vos vos pinsez pleyante ot'tant qui çoulà ? I fât bin fé tot mi minme qwand vos n'estez nin chal.....et a pwerpos, kimint si passe l'inregistremint ?

Pénélope : Moncheû Hinri ènnè fet on po d'trop et l'ajant di sécurité, lu, n'arrête nin di tchanter, dji poû dire qu'il est fwert bon so s'kèsse là

Tîbât : Vos l'mettrez pus târd divins l'émission « Ine vwè po tote » ; i n'ârè on candidat di pus insi po l'émission o on étind pus les tchets tchawer qui les râskignous.

Pénélope : Li prézintateûr trouve qui n'a nin assez des djins po fé pus vreye

Tîbât : Li mèsse del djowe, li prézintateur o li Bon Dju, i n'ârans qu'a fé avou çou qui z'ont, dji'n va co nin rataker les contrats.

Pénélope : Vos avez taper des contrats ? C'est à mi dè fé çoulà, vos prinez mi pan foû del boke

Tîbât : Si n'est nin les contrats po çou qui vos pinsez et pwis vos n'sâriz nin èsse à fore et à molin et d'pus, i v'fât dèdjà bin tot avou vos dîh deûts po fé ine saqwè.

Pénélope : Vinez dire qui dji so trop bièsse po fé mi mestî ? Savez qui mi, dèmon, dj'a mi certificât di stèno-dactylo et vos, vos avez qwè ?

Tîbât : Bon, bon, ni'v mâvlez nin po si po. Dji'm va veur çou qui s'passe. Ureusemint qui tot s'passe bin, po ine feye qui dji di l'vreye (*sort*)

Pénélope : (*à téléphone*) Allo....awè, tot va bin.....por nos mins po les ôtes, i n'a di qwè rire....bin awè, il est todi près di ses çanses.....çoulà dj'el sé qu'il âreû d'vou prindre des djins di mesti mins qui volève, ça rivint pus tchir.....li narène divins l'encène.....i n'a onk qui poreû fé l'afêre por nos..... çoulà va vos éwarer mins c'est l'ajant di sécurité. Dji mi moke di lu divant les ôtes mins, dji poû dire qui sé djower li comédeye et d'pus, il a ine bêle vwè. Vos volez qui dji sâye dè l'égadji po nosse émission.....dji'v acertineye qui c'est li vedette di l'âneye, à s'diminder kimint i l'ouveure come ajant di sécurité et d'pus, tot les mousemints li va.....d'acwerd, dji'm va sahi mins, dji'n promette rin.....il est tiestou. Dji'v là, vochal ine saqui

## Sinne III

Luc – Roland – Jwana

Roland : (intrans) Djâsez'v tote seûle ?

Pénélope : Dji répète mi tèce, si n'est nin si âheye qui çoulà di fé moussi divins m'tièsse des si longues frâses et i fât saveur qwand on deû les dire

Roland : Poqwè n'estez'v nin avou les ôtes ?

Pénélope : Dji'n sé nin èsse dè deus costés al feye. I fât tchuzi : li buro, l'émission o vosse fré. Mettez'v al tièsse qui dji'n so nin ine machine, po fé tot çoulà, i m'fâreû ine p'tite ogmintâcion.

Roland : Les çanses, vos n'avez qui çoulà al tièsse turtos, mi çou qui dji voû, c'est qui l'ovrèdje seû fet et tot dreut, avez'v étindou. Li patron chal...c'est qui ?

Pénélope : Li patron est tot simplumint li grand directeur, moncheû Binamé et, moncheû Binamé pwète bin si nom, si n'est nin come vos qui n'arresté nin dè prindre les djins po des mantês qu'on pind o dispind qwand on voû. Escusez'm mi frankisté mins, falève qui dj'el deye . Asteur, si vos avez dandji di mi, dji so divins m'buro (*va avé si buro* )

Roland : Ah bin, on m'aveu mây djâsé come çoulà

Pénélope : (riv'nant so ses pas) I n-a on kimincemint à tot et il est timp qu'on vos djâse del minme manire qui vos djâzez âs djins. Nos n'estans nin des bièsses, avez'v compris ? (sort)

Roland : I fâreû qu'ele prenne on djou sins certificat....cwand elle est divins ses mâvas djous...n'espèche qu'ele n'a nin l'dreut di'm djâser come çoulà

*Luc inteure tot pèneu suvou di Jwana*

Roland : Vos 'nn' fez ine drôle di tièsse ? Avez'v pierdou vosse qwinzine ?

Luc : Dji'm dimande poqwè on dit qui nosse payis est libe et démocratique o nos avans li dreut al parole. Volà li grand patron qui vou m'mette a l'oûh asteur po aveur dit çou qui dji pinsève et d'pus, dji 'm r'trouve divant li tribunâl. Ureusemint, dj'a co avou li sotyint di certins di mes camarâdes

Roland : Qu'ènnè pou-dje là divins, c'est vos qui l'avez cwèrou

Luc : Vos inmez bin qu'on vos rotes so les pîs, qu'on s'moke di vos. Trinte ans di mohone et volà tot li remerciemint. Bin vite nos n'sèrans pus mèsse divins nosse patreye

Jwana : (*est à l'intreie del pwète et a tot étindou* ) Qu'ènnè d'hez'v di tot çoulà ? Vos lèyez l'istwère insi

- Roland : Si n'est nin mes afêres et d'pus, dji vou warder mi plèce
- Jwana : Vos estez bin come tos les ôtes, ine grand badjawe et dji so co onièsse qwand dji di çoulà, dji poreu dire ot'tchwè mins qwand i fât bodji, les rats cwittèt li batè
- Roland : Si n'est nin vosse istwère adon, occupez'v di çou qui r'louke o adon, vos n'fré pus parteye di l'équipe et vos irez fé bènire des p'tites médayes. Tote façon, il est todi so li houpdigué, c'est cåse di s'timpéramint qu'il est divins l'trô.
- Jwana : Si n'est nin po ot'tant qu'on deus l'mette à l'ouh. On a nin l'dreut d'èsse insi avou les djins, qwand on est al tièsse di tos, dji loume çoula del diktature et si istwère divins l'istwère d'a turtos (*sort dè buro*)
- Luc : Dj'ènnè va, dji'n voû nin câser des displis, damadje qui l'veye va so flote. Dji vinré cwèri mi cwarton dimin. Dj'a radjou avou mi avocât , sohètans qui va mi setchi foûh di là
- Roland : C'est çoulà, et dji'v sohète bone m.....escusez'm si dji n'sé rin fé por vos, i fât comprendre, qui divins vosse situâcion, dji'n poû nin mi permette.....
- Luc : Dji'v comprend et dj'ènnè freû ot'tant por vos (*sort dè buro*)
- Roland : Si ça continowe, on va v'ni dire qui çou qui li arriv ça va èsse cåse di mi. Si n'est nin mi qu'a-stu s'crire sur « Visèdjebook » des biestreyes. Al plèce dè serrer les ouys mins, néni, moncheû a volou fé di s'narène et volà çou qui s'passe.

#### Sinne IV

Bertrand – Roland – Jwana – Hinri - Pénélope

- Roland : Hinri, qui fez'v chal ? Vos d'vriz èsse so l'platé po l'inregistremint di l'émission
- Hinri : Fré, qui s'passe-t-i avou moncheû météo ? Il a ine tièsse d'ètèremint a fé tchouler on mwert
- Roland : I n'a qui l'âreû d'vou r' louki a deus feye divans di sicrire des biestreyes so « Visèdjebook » et pwis vos n'alez nin vos y mette ossi, lèyi cist istwère so l'costé et occupez'v di vos afêres
- Hinri : Néni fré, mes camarâdes et mi arrêrans l'émission tint qu'on n'a nin ine solucion po l'ome, i fê pârteye del mohone et di vosse grande famille
- Jwana : (*arrivant*) Tot li personnel est d'acwerd so s'kèsse là, i nos fât trover ine solucion
- Roland : C'est ine mutin'reye, vos alez m'el payi , turtos a l'oûh minme vos...fré
- Pénélope : (*sortant di s'buro*) A vosse plèce, dji n'freû nin çoulà moncheû li suti
- Roland : Vos..... occupez'v di vos papis et moussi divins vosse buro

- Pénélope : Vos v'pinsez suti mins, vos rouvriez qui si vos les mettez turtos à l'oûh, vosse émission toum'rè à l'èwe et pwis, dji vin dè lère les contrats, tot a-stu candji et dji'm dimande bin qui a fet çoulà ( *si dotant d'ine sacwè* )
- Roland : Kimint çoulà candji les contrats, vos vos mariez mam'zelle. Si n'est nin mi mesti dè taper al machine, c'est vos
- Pénélope : Mins qui donne les ordes chal ? Polez'm dire adon, poqwè mi machine est so vosse burô et nin divins l'meune ? Dji'v acertineye qui dji n'a taper nou contrats disqu'asteur, tot çou qui dj'a fé , c'est des copies po Tîbât
- Roland : Des copies.....des copies di cwè ?
- Pénélope : Dji n'a nin r'louki. Dji n'a qui deûs ouys, adon r'louki mi tecse et après qui vos savez....dji n'sâreu aveur des ouys tos costés
- Jwana : Qui m'racontez'v là ? Ça voû dire qwè candji les arindjemints ? Espliquez'm ?
- Roland : Mostrez'm on contrat
- Pénélope : Tinez, mins dji'v acertineye qui dji n'a may taper çoulà. Tot a-stu candji
- Roland : (*Tot lèyant*) Si n'est nin possib, qui a-stu sicrire des biestreyes come çoulà. On deu dimander à totes djins participant a ine émission, li dreut di montrer leû visèdje et d'pus, on paye nin si pô les figurants....bin qui chal, s'esteut po rin
- Hinri : Â kimincemint mins, si vos n'volez nin bodji po Luc, nos volans èsse payi à minme pris qui les ôtes, i fâre riveur tot çoulà. Estez'v onièsse o nin ?
- Roland : Dji so onièsse, c'est leye qui mette li displis inte nos....Mathahari qui vos estez.
- Pénélope : Mathahari, r'louki çou qui vos d'hez. Poqwè sahez'v dè mette tos les mèhins so mes spales, c'est mutwè ine saqui d'ôte qu'a taper les contrats.
- Bertrand : Po qu'on n'seu nin payi assuremint
- Roland : Oh vos, vos n'pinsez qu'âs çances, i n'a rin d'ôtes so l'terre qui les çances, nos d'vans turtos nos serrez li cinte aler à pus abeye po qui nosse l'émission veu l'djou.
- Hinri : Pénélope a dit qu'elle aveut fé des copies po Tîbât, c'est mutwè lu qu'a candji les contrats
- Roland : Ni pinsez nin dè mâ di lu, dji li fé confyince les ouys serrés



## Sinne V

## Les minmes pus Tchètchè

- Tchètchè : *(tot intrant)* Dji'n pinse nin qui vosse émission ni veû nin li djou, i n'a des ôtes qu'on dèdjà pris l'ideye. Dji vin d'ètinde li rèyalisateûr et, i n'falève nin èsse surdo po nin l'ètinde. Dji pinse qui, si il apice li cis o l'cisse qui nos a djower cègnes royés va li payi bin tchir
- Roland : Si n'est nin possib, i n'a nin des micros avå chal ; si n'est nin li Wardergade
- Tchètchè : Divins mi mesti dj'enn'a vèyou totes sorts, nin mèzâhe d'on micro. Des bones oreyes, ça vât bin tot les micros, i n'fât nin creure qui n'a des James Bond o des OSS 117, çoulà si n'est qu'à cinéma
- Hinri : Qu'alans-gne fé adon, mi qui pinsève candji mi veye....dj'el sintève bin mi rôle
- Jwana : Et mi, qui m'rafiève tot pinsant qu'ine saki mi rimarqu'reu et mi don'reu on rôle divins on grand film, mi volà co ritourné divins mes fârdèdjes.....dji n'a m'so
- Roland : Dihez'm camaråde, kimint li rèyalisateûr a sèpou li novêlé ?
- Tchètchè : C'est si sicrètère qui m'aannonci qui li projet esteû so flotte. Li grand patron âreû riçu ine lette anonyme
- Hinri : Ine lette anonyme mins, d'a qui ?
- Jwana : Ennocint, si i mette si nom, ele n'est pus anonyme. Wice avez'v li tièsse ?
- Tchètchè : ....dihant qui si émission esteû dèdjà so ine ôte tchinne et qui ça ni rotève nin mins, qui ça galopève
- Hinri : Nos volà co so flotte ! Dihez'm poqwè les djins ni morrèt nin on po pus, çoulà rimetreû on po dè bourre divins mi veye. Dji n'a pus qu'a rintré è m'mohone et attinde qu'onk si pète li narène
- Pénélope : Vos estez d'on optimisse, on vos mettreû å Gouvernemint, i sèreû dèdjà so s'cou o adon, turtos étrin di tchouler
- Hinri : Dji'm risètche di l'istwère. Bon corèdje fré , i va vos ènnè faleur tot plin
- Roland : *(toumant li cou so tchèyire )*...et mi qui pinsève qui tot alève bin, qui nos âriz stu divins les timps, nos volà come des arlaques. I n'a pus qu'ine afère a fé, prendre mes « clics et mes clacs » et aler ovrer avou vos fré. Dji n'a m'so di tot çoulà, qui tot l'monde mi mette des battons divins les rows.
- Tchètchè : Nos irans prendre on verre po nos rimette et on po djâser di tot çoulà. Dimin, dji riprind mi plèce d'ajant avou totes les bêles istwères qui dj'aveu el tièsse. Ajant dji so et ajant di diman'rè tote mi veye.

- Jwana :       Dji'v su Tchetchè, vinez'v vos ôtes ?
- Roland :       Po kiminci ça stu li grève cåse di moncheû météo et asteur çoulà, s'ennè trop por mi. Tote façon, dj'aveû so les rins qui ça alève mà fini. Dji'v pâyè li verre dè grand départ. *(sortet turtos sâf Pénélope )*
- Pénélope :    *( À téléphone )* Allo, c'est mi.....néni, vos m'avez mettou divins li sipéheur.....a cåse del lette. Kimint çoulà ci n'est nin vos, tote façon ni rouviez nin mes çanses, dji'n ouveure nin po rin come brâmint d'ennocints.....mins.....adon si c'est nin vos, c'est qui.....on concurent o adon....

### Sinne VI

#### Tchetchè – Tibât et les ôtes

- Tchetchè :    ...o adon qwè mam'zelle Pénélope ? Veyez'v moncheu Luxembourg, asteur i n'a pus nol dotes, vosse « foyant » o vosse espyionne, est divant vos ouys
- Pénélope :    Espyionne, ça n'va nin l'tièsse, dji téléphonève a mi mame po li dimander....
- Roland :       Des çanses !
- Pénélope :    Awè des çanses, ine feye ni pout nin dimander des çanses à si mame ?
- Roland :       Sya.....mins, vos rouviez qui vosse mame volà dèdjà dîh ans qu'elle est mwète
- Pénélope :    Dji djâse avou si speur, dji djâse avou l'àu-delà.....
- Tchetchè :    Et li numéro di téléphone est l'cis del tchinne adverse. I n'a on p'tit moumint qui dji'v tinève à l'ouy. A tot cop qui nos djâzis d'ine sacwè a pwerpos di l'émission pilote, vos vos risètchi po téléphoné. Volà li fâte. Vos estez trop prèseye d'informer vosse contact
- Jwana :       Vos avez pinser nos mette turtos divins l'imbaras mins volà, vos estez toumeye divins li piège....dihez'l moncheû li producteur
- Roland :       Awè Pénélope, vos estez toumeye divins nosse hapâ qu'a, i n'a mày avou di lette anonyme o qwèque si seu. Nos avans émantchi cist istwère po veur si nosse ajant di sécurité aveu rêzon o twert
- Bertrand :    Tote façon, nos avans mettou ine deuzinme solucion si i n'avève avou on gros méhin mins, çoulà personne ni l'a mày dit
- Pénélope :    Kimint çoulà et li contrat, li contrat qui Tîbât m'a dinné po fé des copies
- Roland :       Tinez, vos avez vèyou qui s'esteut des contrats et portant, a vos ètinde, vos n'savi nin çou qui s'esteû
- Tîbât :       Vos savez Pénélope, po apici on pèhon, i fât on apât et ....vos l'avez bin avalez

- Hinri : Pénélope mi feye, poqwè avez'v fet çoulà ? N'estans nin chal turtos po gâgni nosse veye, po s'édi les onk les ôtes, po rimpli les kèsses di l'état, po êdi les bankes qui tapet nos çanses po l'finièsse, po.....
- Roland : Hinri arestèz, nos n'estans nin a mèsse
- Pénélope : Et poqwè nin, tint qui nos y estans, n'avez'v rin a kifêser Roland a pwerpos di nos ?
- Roland : *(djinné et éwaré)* Di nos deus, dji'n veû nin çou qui vos volez dire. Vos estez mi sicrètère, c'est tot
- Pénélope : Rin qui vosse sicrètère, ènn'estez'v sur ? N'avez rin rouvi ?
- Jwana : Dji sins qui ça va div'ni tchôd.
- Roland : *( si dotant d'ine saqwè )* Pénélope prenez asteume à çou qui vos alez dire.
- Pénélope : Estez'v djinné dè dire qui vos avez stu mi galant, qui nos nos estans inmé è catchète et qui vos m'avez lèyi toumé come ine vîle clicotte. Vos n'avez may aresté dè dire qui vos alez cwiter vosse feume po viker essonle mins moncheû n'a nin l'has di cour di li avouwer, moncheû n'est qu'on panê-cou....édon Roland
- Roland : Pénélope, vos pierdez li tièsse.....vos ovrez di trop
- Tîbât : Lèyez'l djâser. Adon insi vos avez stu li crapôte d'a Roland. Vos avez bin broulé les ouys âs djins et vos ossi Roland. Nouk chal, s'ènn'a aperçu.
- Hinri : Fré, dji n'âreu mây tuzer çoulà di vos, qui va-t-ele dire vosse feume ?
- Roland : Nin mèzâhe d'el tchanter so tos les teûts. Divins li veye, on pou hiper so l'carpette....ça arrive a bêcop di djins
- Pénélope : Et mi, dj'a ridé ossi et po m'vindji, dji m'aveu mètou d'acwerd avou li tchinne adverse po leuannonci tos vos projets. C'esteut mi vindjinse
- Tchètchè : Dji comprind asteur vos clignettes vos avez sahi di m'andoûler po rindre djalot vosse ancyin galant et si dj'esteû intrer divins vosse djeu, dj'âreû pou piète mi mestî o minme, moncheû li producteûr âreût tuzer qui dj'esteû in'adversère di coûr, veur minme, on espyion del tchinne adverse
- Pénélope : Lu....pinser à qwè, a lu.....cèrtinnemint mins âs ôtes.....vos polez todi corri
- Hinri : Portant, il a pinsé a s'feume tot refusant d'el cwiter por vos, li prouve qui l'inme si l'a-stu so l'costé, il a sâvé si veye di famille. Si coûr li a mostré li bone veye.
- Pénélope : Vos polez djâser, cwerbâ di kermesse, vos n'savez nin çou qui s'est ine vreye feume
- Hinri : Oh sya, ine freye feume est ine feume qui prind asteume a si ome mins vos, avez'v dèdjà rèspècter ine saquî ?

- Tîbât : Dihez, cist istwère è pus grâve qui li cis d'a moncheû météo. Suvez'm, nos irans trover li grand patron po djâser di tot çoulà
- Roland : *(si riprinant )* A pwerpos di grand patron, a-t-i ine décision a pwerpos di l'afêre Tillemans ?
- Tîbât : Ni vinez nin potchi so ot'tchwè po vos sètchi del sipéheur. Po l'moumint, l'istwère est todi so l'feu et on rattind on djudjemint. Houtez turtos, dji so d'acwerd avou vos qui vos fez grève po apwerter vosse soutyin a nosse camaråde mins, pinsez'v qui çoulà va arrindji l'istwère ?
- Jwana : Houtez, cist istwère poreût arrivé à n'importe qui et nos d'vans nos sèrrez les coudes. Onk qui s'batte n'arriv'ré a rin mins, turtos essonle, nos polans fé bodji l'istwère et, dji'n sé nin si vos pinsez come mi, mins n'a-t-i nin pus grâve so l'terre qui çoulà ? On cwire displi âs djins qui ovret mins les cis qui viket so l'potche des ovris, ils ont tot les dreuts.
- Pénélope : Et vos n'dihez rin so çoulà. Ele n'est nin mî qui mi.
- Hinri : Divant dè djudji les ôtes, riloukez'v ! Vos avez bin viké so l'potche di m'fré
- Roland : Hinri, arester asteur, ni rimettez nin di l'ôle so l'feu
- Jwana : Houtez, nos alans fé.....
- Tîbât : *(tot l'copant )* Ça va, ça va, attindans li prononcé dè djudjemint.

## Sinne VII

### Turtos pus Luc

- Luc : (tot intrant) Qui fêve turtos chal ?
- Roland : On v'espliqu'rè pus târd. Et adon, vosse istwère ?
- Luc : Dji so passé par li p'tit trô mins dji so sâvé. Li djudje ni m'a nin condâmné mins m'a rimonté les brutelles.
- Tîbât : Et qu'a dit li directeu'r ?
- Luc : Dji pou wârdèr mi plèce al météo, grâce a mi bon ovrédje et d'pus, il a dandji di mi qu'a, i va fé on voyiédje è mongolfière adon, i compte so mi po li diner des bons conseyes
- Tchètchè : Dji'n voreû nin rimouer li fier divins li plâye mins, kimint cist istwère a-t-ele kimincé ?
- Jwana : Lèyi on po l'ome pâhule asteur qu'il est rimettou di tot çoulà et pwis, ça ni vi r'louke nin

- Luc : Après çou qui dj'a étindou.....dji'v rimercie turtos di m'aveur sot'nou divins vos aktes et vos pinseyes. Câse di mi, li mohone âreû pout aveur des grâves displis et mâgré çoulà, vos estez dimané adlé mi. Bon, dji'm va vos espliqué, dji'v deû bin çoulà
- Pénélope : Afin, on passe a k'fêsse
- Tîbât : Vos, vos friz mi del clore et dè houter qu'a, i n'ârè nouk po vos sotni après çou qui vos avez fet minme, si c'est ine vindjinse
- Luc : Des moudreus m'ont suvou è vwèture, i m'ont fet ine cawe di pèhon et m'ont èvoyi divins li corotte. Dj'a potchi foû di'm vwèture et dji leu a dimandé çou qui volève po mi sure come çoulà. I n'a onk qui m'a tapé al terre et so s'timp là, l'ôte a kimincé à taper des cops d'pîs et des pires so m'vwèture, après, i z'ont vanés èvoye. Dj'a stu pwerté plinte qu'a, dj'aveû pris li numéro di leu vwèture mins, s'esteû ine fâse plake. Li police n'a rin fet po les r'trover, qui dè contrâve, on m'a dimindé di'm calmer. So çoulà, dj'a stu sicrire so « Visèdjebook », çou qui dji pinsève des étrindjirs et a pârti di çoulà, les displis ont attakés. Nos estans divins on payis libe o li dreut al parole est po tot l'monde.....lèyez'm rire. On a djusse li dreût del serrer et di payi po les ôtes.
- Jwana : Et c'est câse di çoulà.....dji'v comprind, dj'âreû adji come vos
- Tchètchè : Poqwè vos et nin in'ôte djin ?
- Luc : Vos savez, des djins come nos, qu'on veû tot les djous al tv, i-n-a qui pinset qui nos avans des hopès di çances
- Pénélope : Ça fet, si dji di qui Roland est wyième, ont va mi cwèri displi ? Mâgré qui dji di li vérité
- Roland : Qui m'racontève là ?
- Pénélope : So l'timp qui vos estez chal, vos n'savez nin çou qui vosse feume è ètrin di fé
- Luc : Li tribunâl a trové qui les damadjès qu'ont stu fet a m'vwèture et qu'ont n'a nin r'trové les cis qu'ont fet çoulà, qui dj'aveu payi assez mins qu'a l'avni, dji'n deû pus sicrire des contes come çoulà.
- Bertrand : Tot est bin qui fini bin minme, si n'a des djins qui n'sont nin d'acwerd avou nos, ils ont vite fet dè serrer li dossi. I n'a des djous o dji voreû qui vosse istwère leu arriv po veur leu tièsse qui frans. On a bin rêzon dè dire qui li lwè n'est nin li minme po tot l'monde. Afin, alans fiesti çoulà al cantine et nos irans après trové li directeur.
- Tchètchè : (a Pénélope) Vos mam'zelle, vos alez m'sure. Nos irans nos espliquer amon li directeur et après, vos irez aponti vos ahèsses po vaner foûh d'chal.

Pénélope : Vos, vos n'avez rin a m'dire, vos n'estez qu'on arlaque chal, ine p'tite djin sins importance.

Roland : Seulemint, i riprézinte li sécurité et vos, vos n'fé pus parteye del mohone adon, vos alez li sure sins rin dire o adon, nos houk'rans li police.

Pénélope : Vos, vos m'el payrez, dji n'a nin di mi dièrin mot

Roland : Sortez'l foûh d'chal, ele kimince a m'fé assoti

*Tchètchè et Pénélope sortet*

### Sinne VIII

Hinri – Roland - Jwana

Hinri : Roland, attendez on moumint, dj'a ine sacwè a v'dire

Roland : Dji'v houte Hinri mins dispetchiv, dji n'a nin qui çoulà a fé di pus, avou çou qui vint di s'passer

Hinri : Roland, vos n'pinsez nin qui n'a nin assez des catastrofes, des mwerts, des pôves djins so l'terre

Roland : Si n'est nin vos qui m'avez dit qui n'a pus assez des mwerts et qui c'est po çoulà qui vosse botique ni rotève pus

Hinri : Vos savez fré, dji n'a m'so dè veur li tristesse, les mâleurs des djins, li mâleur des onk fet li boneur des ôtes mins y tuzant bin, si n'est nin come çoulà qui tot va s'arrindji. Poqwè nin dinner dè boneûr âs djins

Roland : Volez'v qu'on donne des çanses, des voyièdjès, des vwètures.....qui sè-dje

Hinri : Tot l'monde fet çoulà, totes les tchinnes dinet des çanses, des vwètures, des voyièdjès et ine feye qui les candidats ont riçus leu lot, sont-i pus ureus qu'à kimincemint ?

Roland : Houtez, ça fet qwand minme plêzir di riçure on bê lot surtot, si ça ni vint nin dit-chal. Vos savez, çoulà rivint tchir et fé çoulà tote les samennes....i n'fâreû nin piète si cou

Hinri : (*mokâ*) Rivind tchir.... vos vos rapicî avou totes les réclames qui vos mettez divins vos programmes, i-n-a des djous o dji'm dimande poqwè vos mettez on film divins. Dji'n disconvin nin avou vos mins li boneûr est di coute durêye et di nos djous, les djins ni sont mây pus contint, i grognet todi et çoulà a cåse del veye qui nos minans

Roland : Là, dji so d'acwerd avou vos. On n'djâse pus qui des restrictions, des ogmintâcions, divins kèkès meûs ça va-t-esse les élektions.....nos alans éco étinde des mintes, des promesses et tos li rèsse et çoulà poqwè, po qui leû pârti âye des vwès et ine feye

qui çoulà est fêt, i nos lèt toumer come des vîles tchâssettes. Nos avans chal, des djins qui ont kimincés come ajants contractuels et qui asteur, sont père o mère di famille et qui attindet todi po èsse nommé po aveur, pus târd, ine onièsse ritrète et ses djins là.....rawardrans co et qwand l'djou del ritrète vin'rè, i n'ârans qui leûs deus ouys, pus târd, po tchouler al fin de meûs, ot'tant d'pus qui volet co diminuer les pinchons âs ovris mins, les pinchons des grosses tièsses, fât nin toucher.

Hinri : Volà poqwè, dji'v propose d'apwerté on po de boneur a tos ses djins avou deus feye rin

Roland : Fré, vos n'vis priner nin po li Seigneur.....dji voû bin mins mi, dji'n creû nin âs mirâkes

Hinri : Kimint çoulà vos n'crèyez nin âs mirâkes ? Qwand li prumi minisse vint dire qui n'ârè 120 euros di pus so vosse pâye, tot l'monde li creû, por vos c'est on mirâke adon vos i crèyez mins qwand les foncires arrivèt, vos d'vez rèboûrser li dobe. Tote façon, c'est todi li minme rèspleû qwand nos arivans al période des élecsions, di l'ovrèdje por turtos, des çances por turtos et les potches bin rimpleye....nin por nos mins po zels. Volà çou qui dji propose.....dji sé qui po kiminci, ça n'va nin èsse âheye mins vos veûrez qui ça va apwerté pus del houte qui vos bièsses machins

Roland : Dji'v houte édon, qu'est ce qui c'est.

Hinri : Volà mins, divant de dire néni, houtez'm. Qwand vos fez des concours, des émissions o vos dinnez des çances o des cadôs âs djins, c'est todi les cis qu'on di l'ovrèdje o parfwè nin mins, qui n'vikèt nin so l'voye o divins des rowales.

Roland : Vos savez fré, nos prinans les djins qui prinèt pâr à nosse djeû mins, dji'n veû nin çou qui vos volez dire

Hinri : Al plèce de dinner todi âs minmes, poqwè ni sahive nin de fé participer des djins qui n'ont nole mohone, qui vikèt sins çances. Des djins qui sont so l'voye, divins tot les timp. Tot fant çoulà, vos apwertrez on po pus di boneûr et d'pus, suremint ine bone houte so vosse tchinne. Dji sé qui, po kiminci, ça n'sèrè nin si âheye qu'à, i vont prendre asteume à vos mins tot leu esplikant l'istwère, vos veûrez, i vinrans.

Roland : Vos savez fré, vosse coûr finirè par vos piète mins, dji'n sé nin si l'directeur nos surè so s'voye

Hinri : Poqwè c'est todi les minmes qu'ènnè profitèt. Les sins mohone ni sont-i nin des djins come vos et mi ?

Jwana : ( *qu'a tot étindou* ) I n'a nin twert. I n'a qu'ènnè profitèt di nosse société, qui vikèt so nosse potche mins zels, les pus mâlureus ni dimandèt rin. Totes les âneyes, i n'a qui morrèt so l'voye et qui n'ont come famille on tchin. Wice ès-st-ele leu famille là divins, leus éfants..... ?

Hinri : C'est vreye, è l'ivier, dji fê pus mes afères

- Jwana : Houtez'l Roland, houtez vosse fré et vos veûrez li houte qui çoulà va apwerter.
- Hinri : Si n'est nin cåse qui vos vikez ot'temint qu'in ôte, qui vos estez pus bièsse. I n'a des djins avou qui, li veye n'a nin stu fwert amiståve et cåse di çoulà, ci sont r'trové so l'paveye
- Jwana : I n'a onk qui va co grouler....li prézintateûr. Lu qui a todi dandji di si p'tite djin, qui n'vou nin si fé måssi
- Hinri : I n'ârè qu'a fé avou et si i n'est nin contint.....
- Roland : Vreye çoulà et dji'v su so vosse ideye. Si n'est nin todi ås minme a profiter des djoyes del veyes, tot l'monde deû èsse ureus et dj'a dèdjà li tite di l'émission.....Les paveyes des bons vikants

*(A s'moumint là, on étind on brut vinant del voye)*

- Jwana : *(r'loukant po li finièsse)* Mon Dju, i n'a del fougure, dè feu....treus vwètures et on camion, i n'a des djins so l'voye.....r'louki i-n-a dè song tot costé et des djins brèyèt å sicour
- Tchètchè : *(arriv tot corant)* Vinez bin, vite, on accidint vint di s'fé, on « scoop » po les infos del nute. Dispetchez'v !
- Hinri : *(les brès è l'èr)* Oh merci Seigneur, les afères r'prinèt, sohètans qui n'åye kèkès mwerts
- Roland : Vos estez on tèribe po sohèter li mwert ås djins, qu'avez'v divins l'tièsse ?
- Hinri : Les afères fré, les afères....qui volez'v, i fât bin qui dji vike ossi (sort)
- Roland : Divant dè mori tuzans a viker mins volà, c'est li veye d'asteur qui nos towe, là est li morâlitè di cist istwère.

**FIN DEL PIECE**



